

## KAYAKNU NAI MAKUS YOM

*LAYATAK JOHANES NUG JESUSNU IB BABAITOM*

<sup>1</sup> Kayak Beḱa Jesus Kristusnu Nai Ena amu inam niite.

<sup>2</sup> Anuḱa Kayak Nug propet laa onig Jesaia amegpa aum. Kayak Nug Beḱa Jesus amegpa alo amubia Jesaia amegpa a, Jesaia nug nai amu inam awa yom. “Ante! Da hepi dahil nai awa uḱa matiaknu danab laa nug na noom awa, nahip ib bapaidḱu.

<sup>3</sup> Nug am atu tadakpa dayaya, danab amelagpa inam ewa aḱu. ‘Ag oolagpa ihinig Naḱinu ib bapaidpeg, elele dayad!’ awa aḱu.” Jesaia anam awa yom.

<sup>4</sup> Kayak Nug anam aum dimpa Nug aum bia, Layatak Johannes nug atu tadakpa dayaya, nug danab amelagpa, Kayak Nug ahilag hipunin uhuḱa madakunu ag oolag edueb, layatak aoglagnu nai mehuḱom.

<sup>5</sup> Nug nai anam mehuḱom amu Juda wanpan danab laa oh amu Jerusalemnu danab laa oh ele ag Johannes gumidna gona, hipunin ahilag miag aegeg, Johannes nug Jodan lepa layatom.

<sup>6</sup> Nug lamen kamel uḱigpa hak amu ma, nug imuagpa matagid, dod gadapa hak, amu ele taḱa, nug tap amu upuh lepu ele laḱom.

<sup>7</sup> Anam dayaya amu nug danab amelagpa aum. “Danab laa nug da dimulpa uḱite amu danab amu nuhig gagatag amu dahil edidite, Nug am danab

okainab, da am okai iita. Dahil hak imu nuhig hak amu ele elele iita.

<sup>8</sup> Da ag lepa layadtem amge Nug Kayak Oudipa ag layadku,” awa aum.

*JESUS LAYATAK AWOWA, OO EEDAK ELE AWOM*

<sup>9</sup> Nug anam a amu haen amupa Jesus Nug Galelia wanpa Nasaret abpanu aha udie, Johannes nug Jodan lepa laaitom.

<sup>10</sup> Laaita male, Jesus Nug lepanu aha, audam teete amu hab obate, Kayak Oudi Nug ai upudil bia nuhigpa neene, antom.

<sup>11</sup> Kayak Oudi Nug ne, baag laa hab atannu Nug amegpa aum. “Na am da bekal, da nahipnu ool mauhte. Nahip haknu ele amu da ool ena daate,” awa aum.

<sup>12</sup> Haen amupa pahanab Kayak Oudi Nug he, Jesus Nug atu tadakpa uka,

<sup>13</sup> apa ded 40 dayeye, Satan nug Jesus ehed hekunu oo eedede, Jesus Nug dod dakud oolagpa dayeye, engel ag nug ehanidpig.

*JESUS NUG DANAB TATAMNU ONILAGPA EUM*

<sup>14</sup> Aria haen amu male amu Herodes nug Layatak Johannes mani guitakpa me dayeye, Jesus Nug aha, Kayaknu Nai Ena mehuqaqa, Galelia ukom.

<sup>15</sup> Nug nai mehuqa aum. “Haen malom, Kayaknu do madod haen aaku miag doum amunu ag ahilag hak nau uuna, oolag edueb, Nai Enanu oolagpa genab doyeg!” awa aum.

<sup>16</sup> Ded laa Jesus Nug Galelia le ameg ihipa oiyaya, Nug Simon amu Andreus ele, a am eamag

amu, Nug a ahilah uhui lepa eeheh anatom. A am kakai awak danab amunu a uhui epid.

<sup>17</sup> Jesus anata amu Nug amelahpa aum. “Doya, da dim lamidped, da a danab diiaknu udat ipuanatkul,” awa aum.

<sup>18</sup> Nug anam a amu a paha ahaya, uhui ahilah uuya, Jesus dim lamidpid.

<sup>19</sup> Dim lamiteheh, Jesus Nug nakok laa ele wana, nug Sebedi bekođ Jakobus amu Johanes ele, a ele am eamag amu, Nug a ub ahilahpa daaiya, uhui bapaiteheh anatom.

<sup>20</sup> Anata amu Nug ahilahnu ele aum. “A da dim lamided!” Nug anam a amu a ahai, a mamelah Sebedi, amu ahilkad udat danab oh ubpa daapig ele amu uuadya, Jesus dim lamidpid.

### *JESUS OUDI NAU LAA LAMITOM*

<sup>21</sup> Aria ag Jesus dim lamiteg, ag oh edun Kape-naum gopig. Gona daanna, Nug Metidpa Juda dilag nai doyak laka apa ta, Kayaknu nai ipuanatom.

<sup>22</sup> Ipuanate, Juda danab ag dab mak kudum aopig. Adinu? Nug nukaa keeke oh ha antom bia ipuanatom. Juda dilag do mehuqak danab laa ag amubia ii hedapig.

<sup>23</sup> Ag anam nai doyak laka apa daaegeg, danab laa nug oudi nau ele apa dayaya ewa aum.

<sup>24</sup> “Jesus, Nasaret ted, na ig atem heigkutnu udime? Na hepe, ig nauhkunignu udimete? Da na dooidtem, na am Kayaknu Laa, Opia Awak Ele,” awa aum.

<sup>25</sup> Nug anam a amu Jesus Nug oudi nau amegpa aum. “Na oden qamutna, danab amu uuidna uke!” awa aum.

26 Jesus Nug anam a amu ouđi nau nug he, danab beđu huan hahadeđe, ouđi nau nug baag okaipa ewawa, danab amu uuiđom.

27 Uuiđa male amu danab laa ag danab amu anidna, dab mak kudum aona amu ag aka aka Jesusnu apig. “Imu ađi? Imu doyak laa, ebehi ele. Nug ehah ena ele amu diig amunu Nug ouđi nau amelagpa, ‘Ag ukeg!’ ađe amu ag nuhig nai dim lamidteb,” aon apig.

28 Ag anam anidna, nai amu tuditeg uke, Galelia wannu danab oh doopig.

### *JESUS ODE DANAB KUDUM BAPALATOM*

29 Jesus Nug danab ehanite, Nug ipunitak awak danab Simon, Andreus, Jakobus, Johanes ele ag ahan, Juda dilag nai doyak lag amu uuidna, tutuku Simon Andreus ele laulahpa gopig.

30 Ag gona, laka teegeg, ag Simon nome nug ode, beđu gakađak ele niieye, ag Jesus amegpa aeg, nug doyom.

31 Aeg doya amu Jesus Nug gumita wana, epegpa ada, mad ete ahe, beđu gakađak paha iita me, aaku ah amu nug uka, e ahilag babaiđom.

32 Aria tueb amu aam no, apan danab ag ahan, ode danab amu danab ouđi nau ele oh omaladna, Jesus topa gopig.

33 Ag gona, Simon Andreus ele a laulah odpa qag meeg,

34 Jesus Nug ode danab kudum ag ode diigdiig ele amu bapalata, laa ouđi nau ele amu Nug ouđi nau amu lamatom. Lamate amu ag Nug doopig amunu Jesus Nug he, ag amunu ii apig.

<sup>35</sup> Aria wagde butuanab Jesus Nug lakanu aha, ab uua, aben danab haen oh ii daatebpa uka, unuqitata dayom.

<sup>36</sup> Dayeye, nakok dimpa Simon laikud ele ag Jesus matin

<sup>37</sup> anidna, Nug amegpa apig. “Danab oh ag na matidteb,” aon apig.

<sup>38</sup> Aon aeg amu Jesus Nug aum. “Ipan danabib nai dahil dooglagnu amu da ool ii daate amunu ig ahat, ab laala miag daateb ele amupa da nai dahil mehuqkulnu gokunig. Da amunu udimi,” awa aum.

<sup>39</sup> Nug anam anana amu Nug aha, Galelia wan oh talilita oiyaya, Nug Juda dilag nai doyak laka laalapa nai mehuqaqa, oudi nau danab ag bedulagpa daapig amu ele lamatom.

### *JESUS DANAB GADA ODE ELE EHANITOM*

<sup>40</sup> Dimpa ded laa danab laa nug gada ode ele amu nug Jesus noobpa uka, gateg qaun wa, nug od metam aum. “Na oot heeb amu na hepe, da ode dahil iita meku,” awa aum.

<sup>41</sup> Nug anam od mete amu Jesus Nug oo doye, Nug epegpa danab bedu ada, amegpa aum. “Da ool anam daate! Na ena daye!” awa aum.

<sup>42</sup> Awa a amu pahanab ode amu iita me, danab nug elele dayom.

<sup>43</sup> Elele dayeye, Jesus Nug do gagatag danab amu amegpa inam aum.

<sup>44</sup> “Na danab laa amegpa da na bapaidminu amu aib ame. Iita, na gona, na bedun mana metak danab ipunidna, na Mosesnu do ate bia na dod main, Kayak mete! Adinu? Danab oh ag amupa

dooglag na ode iita,” awa aum. Jesus Nug do gagatag anam mewowa, he ukom.

<sup>45</sup> Jesus anam aum amge danab amu nug Jesus ode bia ii heum. Iita nug uka, danab kudum amelagpa a doopig amunu Jesus Nug abpa miag oikunu elele iita. Nug aben danab haen oh ii daatebpa dayom amge apa ele danab kudum Nug gumidna gopig.

## 2

### *JESUS DANAB EPEG BAEG ELE OH MAUHOM BABAITOM*

<sup>1</sup> Anam dayaya, ded laa dimpa Jesus Nug aha, edua Kapenaum uke, apan danab ag Jesus udiom daate amu doona,

<sup>2</sup> ag ahan, lag Nug dayom ele amupa gona qag mepig. Kudum gopig amunu lag oopa dimitim ele ag aben oh itupig. Itun daaegeg, Nug Kayak nai mehuqom.

<sup>3</sup> Nug nai mehuqege, danab wadele laa ag lailag ode ele, nug baeg epeg mauhak ele, qadaqadpa maon, Jesus topa udipig.

<sup>4</sup> Udieg, ag lag Jesus dayom ele, amupa danab kudum ituak daapig amu ag amupa tena, Jesus gumidna wakulagnu ib iita amunu ag lailag amu maon, lag atan tena, lag amu kodoko udem metak ele amunu ag tena, lag kodoko lopadna, ode danab qadaqad ele mudipa qakan, Jesus noobpa padaeg noum.

<sup>5</sup> Padaeg noum amu Jesus Nug oopa genab doyak ahilag am okai ele anta, Nug ode danab amegpa aum. “Nahip hipunin oh amu da uhuqe medatem,” awa aum.

<sup>6</sup> Nug anam a amu do mehuqak danab apa daanna, ag aka aka dab makpa inam apig.

<sup>7</sup> “Danab imu Nug adinu anam ate? Nug Kayak dabiṭa, awa awa qete. Kayak Nug nukā hipunin uhuqa megakunu elele,” aon apig.

<sup>8</sup> Ag dab mak amu aoegeg, Jesus Nug nuhig dab makpa amu doya, Nug ag amelagpa aum. “Ag adinu dab mak nau anam aoteb?

<sup>9-10</sup> Adi nai am anaknu ug iita? Hipunin uhuqa metaknu nai amute am ug iita, o iita aha tapa ukaknu nai, amutai am ug iita? Amu oh iita. Adit oh am ug ele, danabib hekunu elele iita amunu ag Danab Bekalag da, da wan imupa hipunin uhuqen madaḱulnu gagatag ele, ag amu dooglagnu amu da hepi, aha goku,” awa aum.

<sup>11</sup> Jesus Nug anam anana amu Nug edua, ode danab amegpa aum. “Na ahan, qadaqad nahip aon, laḱa uke!” awa aum.

<sup>12</sup> Nug anam a amu ode danab nug aha, qadaqad nuhig awa, ag noolagpa dimitim ukom. Ugeke amu ag dab mak kudum aona, Kayak binag mena apig. “Ig ded laa keeke amubia ii anidmut,” aon apig.

### *JESUS LEWI ONIGPA EUM*

<sup>13</sup> Aria Jesus baula edua, le ameg Galelia ihipa oiyeye, danab ah laala ag gumidna ukaeg, Jesus Nug Nai Ena ipuanatom.

<sup>14</sup> Ipuanatawa amu Nug aha, wana oiyaya, Nug Alpias beka Lewi, nug takis awak laḱa dayeye antom. Anta, Jesus Nug amegpa aum. “Na dona, da dim lamide!” awa aum. Anam a amu nug Jesus dim lamitom.

15 Dimpa Jesus Nug nuhikud ipunitak awak danab ele amu ag Lewi laugpa e laegeg, takis awak danab kudum, hipunin danab kudum amu danab laa ag Juda dilag do oh ii dim lamidpig, amu ele kudum udieg, Jesus amu nuhikud ipunitak awak danab ele e lapig. Adinu? Ag kudum ag Jesus dim lamidpig.

16 Aria ag e lanan daaegeg, do mehuqak danab amu do gumak danab-Parasia ele ag anadna, Jesusnu ipunitak awak danab od madapig. “Adinu Jesus Nug takis awak danab, hipunin danab amu danab ag ihinig do oh ii dim lamidteb ele amu, Nug ag ele oh daanna, e lanana, le ele lateb?” aon apig.

17 Aon aeg amu Jesus Nug doya, amelagpa aum. “Danab ode iita, nug dokta topa ii gotē. Iita, danab nug ode ele nug gotē. Amubia amu da hepi, danab kobol tutuku enaib hetēb ele, ag oolag edukunu ii udimi. Iita da hepi, danab kobol tutuku ena ii hetēb ag oolag edukunu udimi,” awa aum.

### *DANAB AG JESUS E OH KUD MENA DAAGLAGNU OD MEDAPIG*

18 Aria Layatak Johannesnu ipunitak awak danab amu do gumak danab-Parasia, ahilag ipunitak awak danab ele ag ded kudum e oh lanaknu kud mena daadtapig. Ag anam daaegeg amu ded laa danab laala ag Jesus topa gona, Nug od medapig. “Adinu Johannesnu ipunitak awak danab amu do gumak danab-Parasia, ahilag ipunitak awak danab ele ag hanhan e oh lanaknu amu kud men daateb amge nahip ipunitak awak danab ag anam ii hetēb?” aon apig.

19 Ag Jesus od anam medapig amu Jesus Nug aum. “Da am danab nug ah aote bia. Aria dahil ipunitak awak danab amu ag am da lailad. Amu ig dootem, nug awak haen amu oo gamag ahak ele amunu danab nug ah aote amu, nug laikud ele ag ug doonna, e oh lanaknu kud mena daaglagnu amu iita. Ag oolag gamag ahak ele amunu ag e ii uumna, ag lakulag.

20 Anam aaku daate amge ded laa dimpa ag lailag ah awom ele amu, nug laih ukeb amu haen amupa ag oolag ug ele amunu ag e oh lanaknu kud mena daaglag. Amu da ami. Da am danab ah aote bia. Dahil ipunitak awak danab ag am da lailad bia. Da gemu ag ele daatem amunu ag e oh lanaknu kud mena daaglagnu elele iita. Dimpa da gopi, ag anam hekulag,” awa aum.

21 Nug anam anana amu Nug nai tudita aum. “Danab nug lamen qati bau awa, lamen alagnu gido amupa tona ii koit-te. Iita! Nug anam helo amu dimpa nug lamen iheb, lamen bau nug edua, nakok epa, lamen alag eedeb, patideb, gido okai ele daaku,” awa aum.

22 Anam anana amu Nug nai keeke amunu baula inam aum. “Laa ele amu danab nug grep lepu bau le itaknu dod gada alagpa ii inate. Nug anam helo amu grep lepu nug edua, wain baaba, titida heeb, dod gada alag nug gagatag epom, okai mekunu elele iita amunu nug aodeb, wain amu dod gada ele oh iita mekulah. Ag anam ii heteb. Grep lepu bau amu le itaknu dod gada baupa inaglagnuib daate,” awa aum.

*JESUS NUG METIDNU OKAI DAATE*

23 Aria ded laa Metidpa Jesus nuhikud ipunitak awak danab ele ag ibpa wit dad laa oopa gonana, danab tuelp ag wit aeg laala aon lapig.

24 Anam heegeg amu do gumak danab-Parasia ag Jesus od medapig. “Do nug danab laa Metidpa e datanu ii aoma ipunigte amunu adinu nahipad ipunitak awak danab ag Juda dilag Metidnu do amu tipalna, e aon lateb?” aon apig.

25-26 Ag anam od metaeg amu Jesus Nug amelagpa aum. “Ag Dawitnu nai nakok laa iite eb qepig? Haen amupa Abiata nug mana metak danab dilag iki dayeye, Dawit nug laikud ele ibpa oiyegeg, enug aqeqe, ag gona, Abiata dayompa tena, Dawit nug Kayak laug oopa noa, bret hag ele, mana metaknu danab agib lakulagnu elele, amu awa lanana, nug laikud ele mate, oh lapig.

27 Amunu ag dooglag. Metid ded nug anuqak ii daate. Iita, danab nug Metid ded edita anuqak daate. Da danab edaten gumadtem

28 amunu da Metid ded ele gumatem,” awa aum.

### 3

1 Ded laa Metidpa Jesus Nug Juda dilag nai doyak laka noa, danab laa nug epeg nau, mauha ebehitak ele, apa dayeye antom.

2 Do gumak danab-Parasia ag ele apa daanna, Jesus Nug adi heeb anidkulagnu meidpig. Nug Metidpa danab epeg nau ele ehaniteb, elele dayeb amu ag Jesus hetodiak abenpa mekulagnu oolag dayom.

3 Anam daaeggeg, Nug danab epeg nau ele amegpa aum. “Na ahan, gamagpa hipaidna daye!” awa aum.

<sup>4</sup> Nug anam a amu danab nug hibaita dayeye, Jesus Nug do gumak danab-Parasia od matom. “Do ihinig adi ate? Ig Metidpa ena hekunig am enatai o iita ig Metidpa ehed hekunig am enatai? Ig heput danab mauhku amuam enatai o iita ig heput, danab laa nug mauhkunu hete ele amu nug elele daaku amuam enatai?” awa aum. Nug anam od mate amu do gumak danab-Parasia ag Jesusnu od mak amunu nob mekulagnu oolag ii dayom amunu ag to etan, hamu daapig.

<sup>5</sup> Ag to etan daaegeg, Jesus Nug neeka anaṭowa, ag oo doyak iita, ag danab ehanidkulagnu oolag ii dayom amunu Nug opodi be, oopa guitak doyaya, Nug danab epeg nau ele amegpa aum. “Na epen tai ete!” awa aum. Jesus Nug anam a amu danab amu nug epeg tai ete, epeg edua, laih bia, ena dayom.

<sup>6</sup> Jesus anam heum amunu do gumak danab-Parasia ag ahan ukæg, Herodes laikud ele qag mena, Jesus qekulagnu ib madipig.

### *DANAB KUDUMNAB JESUS DIM LAMIDPIG*

<sup>7</sup> Jesus Nug anam he amu Nug nuhikud ipunitak awak danab ele ag ahan, ab amu uun, Galelia le amegpa ukægeg,

<sup>8</sup> Galelianu danab, Judanu danab, Idumianu danab, Jodan le laihpan danab, Jerusalemnu danab, Taianu danab amu Saidonnu danab ele, ag oh Jesus kobol hetom doopig amunu ag Nug anidkulagnu dim lamidna gopig.

<sup>9</sup> Ag kudumnab gopig amunu Jesus Nug nuhikud ipunitak awak danab amelagpa aum. “Danab kudum qataetak daana, hautidmananu amu ag ub

nakok aon dopeg, kobol anam beeb amu da ubpa tekul,” awa aum.

<sup>10</sup> Adinu danab ag Jesus hautkulagnu hepig? Jesus Nug ode danab kudum bapalatom amunu ded amupa ele ode danab kudum danab ah oolagpa daanna, Jesus gumidna wana, Nug bedu adaglagnu wagai mepig.

<sup>11</sup> Amu danab laala ag oudi nau ele ag Nug aniteg, oudi nau ag heegeg, ag Jesus noobpa nena gena, wanpa niiegeg, oudi nau danab bedulagpa daapig ele amu, ag epig. “Na Kayak Beḱa,” aon apig.

<sup>12</sup> Anam aeg amu Jesus Nug am Kayak Beḱa amu ag amunu miag atiak ii amananu, do gagatag matom.

### *JESUS NUG IPUNITAK DANAB TUELP TITUANATOM*

<sup>13</sup> Ded laa Jesus Nug qaukopa ta, nuhikud ipunitak awak danab diikunu oo dayom ele amu, Nug ag onilagpa e, ag Nug gumidna gopig.

<sup>14</sup> Nug danab tuelp Nug ele daaglagnu tituanata, Nug aum. “Da ag maadpi, ag gona, nai ena dahil mehuqkulagnu tituanadmi.

<sup>15</sup> Laa ele, da oudi nau lamadkulagnu gagatag ele madakul,” awa aum.

<sup>16</sup> Nug danab tuelp tituanatom amu ag onilag am inam. Tatam am Simon amu Jesus nug onig laa Petrus atadom.

<sup>17</sup> Adit laa amu Sebedi beḱod Jakobus Johanes ele. Jesus Nug a onilah laa Boanesis atadom. Onig amu nuhig meu amu, “Haḱad beḱod.”

18 Laa oh onilag am Andreus, Pilipus, Batolomiu, Mateus, Tomas, Alpias beka Jakobus, Taidius, Simon, nug am Selot,

19 amu Judas Iskariot ele. Nug am Jesus keked epelagpa meum.

20 Aaku Jesus Nug edua laka uka dayeye, danab ah kudumnab ele qag mepig. Qag mena daeegeg amu Jesus Nug udat haaha, e nakok laa awa, lakunu haen elele iita.

21 Anam dayeye, Nug anig amakud ele ag amu doona, ag ahan, Nug omalna gokulagnu udipig. Adinu? “Nug kaaka qeum,” aon apig.

22 Ag anam aegeg amu Juda dilag mehuqak danab ag matu Jerusalemnu nepig amu ag Nug heumnu inam apig. “Amu Belsebub, nug am oudi nau ikilag, nug danab imu bedupa daate. Daate amunu Nug gagatag amupa oudi nau lamadte,” aon apig.

23 Ag anam aeg amu Jesus Nug he, ag gumidna doeg, Nug keeke danab ag dooteb ii dooteb ele ou aqata, ipuanata nai amupa amelagpa inam aum. “Satan nug atemun Satan lamidkunu elele?”

24 Wan laipupan danab ag ahan opatna, ameg adit bena, nug qekulag amu wan amu nug ena ii daama.

25 O ab iki laa ele anam. Ag opatna, ameg adit bena, nug qekulag amu ab iki amu nug na qeku.

26 Aria Satan ele anam. Nug laikud ele ag opatna, laih laih daanna, ban heteb dayeb amu ag daaglagnu elele iita. Ag iita mekulagnu daateb.

27 Danab nug danab gagatag ele, nug laugpa hamu noa keeke laa ii aote. Nug tatam danab gagatag ele mudipa hipalowa, nug danab amu

laugpa noa, keeke yab aoku. Amubia da Satan editak daatem amunu da nuhi kud daup lamadkulnu elele daatem,” awa aum.

<sup>28</sup> Jesus Nug anam anana amu Nug nai baula tudita aum. “Da genab ag amelagpa aтем. Kayak Nug ahilag hipunin, amu nuhignu amu nuhig keekenu ele dabita awa awa qetak nai ahilag oh ele amu Kayak Nug uhuqa madaku

<sup>29</sup> amge laa nug Kayak Oudi dabita, awa awa qeteb amu Kayak Nug hipunin amu uhuqa ii metama. Hipunin amu iita ii mema, hanhan daaku,” awa aum.

<sup>30</sup> Ag, “Jesus Nug oudi nau ele,” apig amunu ag Kayak Oudinu anam amananu, Jesus Nug anam amelagpa aum.

### *JESUS BAEKUDPA NUG ANIDKULAGNU UDIPIG*

<sup>31</sup> Jesus Nug anam anan dayeye amu Nug anig amakud ele udina, dimitim daana, Jesus gumata dokunu danab laa amegpa aeg, nug danab daapig ele amu, ag amelagpa aum.

<sup>32</sup> Danab ah kudumnab ag Jesus talilidna daanna, nai amu doona, Jesus amegpa apig. “Na anin amapad ele na anidkulagnu uдин, dimitim daateb,” aon apig.

<sup>33</sup> Aon aeg amu Nug aum. “Da anil amalad ele am aun adi?” awa aum.

<sup>34</sup> Nug anam anana amu Nug neeka oiyaya, ag talilidna daapig amu anata, Nug aum. “Anteg! Imu amu da anil amalad ele.

<sup>35</sup> Danab laa nug Kayaknu dab mak dim lamidte amu nug am da anil, amal, apinal ele,” awa aum.

## 4

*E EPAKNU NAI*

<sup>1</sup> Aria Jesus Nug Galelia le ameg ihipa mehuqak udat dig meum. Dig me amu danab ah kudumnab u<sup>u</sup>din qag mepig amunu Jesus Nug ubpa teum. Nug te, danab ah ag le ihipa daaegeg,

<sup>2</sup> Jesus Nug keeke danab ag dooteb ii dooteb ele ou aqata, ipuanata, nai amubia kudumpa mehuqaga, inam matiom.

<sup>3</sup> “Ag nai imu doona maidkulag. E epak danab nug e hadag ebakunu aha,

<sup>4</sup> data uka oiyaya, e hadag taodom. Nug taoda ugeke, hadag laala amu danab ib oitebpa nena qena niiegeg, ai ag u<sup>u</sup>din, hadag amu lapig.

<sup>5</sup> E hadag laala ag wan men duqe ukak amupa nena qepig amu wan unuqag iita amunu pahanab bepig

<sup>6</sup> amge aam na qe, ag didilag wan oopanab ii noum amunu bunadp<sup>i</sup>g.

<sup>7</sup> Aria e hadag laala ag wan mud<sup>i</sup> qaun elepa nena qeeg, mud<sup>i</sup> qaun ba, nadi ma, teguate, bunadna, meu ii opig.

<sup>8</sup> E hadag laala ag wan enapa nena qena, ena bena, meu opig. Hadag laipu laa beum amu nug aeg tieti oom, laa am siksti oom amu laa am wan handat oom.” Jesus Nug anam aum.

<sup>9</sup> Nug anam anana Nug baula ele aum, “Danab nug daug ele dayeb amu nug doypad!”

<sup>10</sup> Jesus Nug anam a amu dimpa Nug amu nuhikud ipunitak awak danab tuelp amu nug laikud laala ele ag aka daanna, ag Jesus nai aum amunu od medapig.

11 Od metaeg amu Jesus Nug aum. “Ag am Kayaknu do madodnu keeke diig lokumak amu dooglagnu matom amunu ag dooteb amge danab laala, ag dahil nai dim ii lamidteb, ag nai danab nug keeke danab ag dooteb ii dooteb ele ou aqata, ipuanadte, nai amupaib anidteb

12 amunu Jesaia nai yom, nai amu elele medate. Nai am inam. ‘Ag neegteb amu ag diig tutuku ii anidteb. Ag nai daulagpa dooteb amu ag diig atemun tutuku ii dooteb. Ag doyaknu uuteb. Ag anam ii helob, ag nai dahil doona, ag oolag edueb, Kayak Nug ahilag hipunin uhuqa matalo,’ ” awa aum.

13 Jesus Nug anam anana amu Nug Nai baula tudita aum. “Da keeke danab ag dooteb ii dooteb ele ou aqaten ipuanaten ami amu, nai amuam ug iita amge ag meunab nuhig ii doopig amunu dimpa da nai amubia amge gagatag ele madipi, ag atem oolag maidku?

14 Danab nug Kayak nai mehuqte amu nug am danab e ebte bia.

15 Hadag laala ibpa nena qepig ele amu, nai amu inam ipunigte. Danab laala ag nai dooteb amge Satan nug paha ag oolagpa noa he, Kayak nai iita mete.

16 Amu e hadag men duqe ukakpa nena qepig ele amu, nai amu inam ipunigte. Danab laa ag nai doon, oolag gamag ahehe, pahanab aoteb

17 amge ahilag oopa genab doyak am gagatag iita, haen tutunuib amunu ded laa ag dahil nai dim lamidteb, diig amunu ug laa bete, o danab laala ag heeg, qagaetak dooteb amu ag pahanab ahilag oopa genab doyak padateb.

<sup>18</sup> E hadag wan muḍi qaun elepa nena qepig ele amu, nai amu inam ipunigte. Danab amu ag nai dooteb

<sup>19</sup> amge ag wan imupan ug laala, amu enub awak udat amu ameg qak kobol ele, keeke amu oh ag oolagpa he, Kayak nai iita ma, meu ii ote.

<sup>20</sup> Aria e hadag wan enapa nena qepig ele amu, nai amu inam ipunigte. Danab laa ag nai doonna, aon oolagpa meteb amu ag meu ena oteb, laa tieti, laa siksti, laa handat, anam oteb,” awa aum.

### *AMAH LAKNU NAI*

<sup>21</sup> Aria Jesus Nug nai imu ele matiom. “Danab laa nug lam amota, tapid okai waapa o iita balal waapa metete? Iita! Nug amota, atan me eote.

<sup>22</sup> Amubia gemu keeke laa lokumak daateb amge dimpa miag atiglag. Keeke oh danab ag lokumpig daateb amu dimpa ag miag atipeg, danab oh anidkulag.

<sup>23</sup> Danab nug daug ele dayeb amu nug doyaq!” awa aum.

<sup>24</sup> Aria Jesus Nug baula aum. “Ag doyeg! Ag lailkad dilagnu kobol tutuku o kobol ehedpa epediadkulag amu Kayak Nug ele melemel amupa ag hetodiata, baula ele tudidku.

<sup>25</sup> Danab laa nug Kayak nai adate ele amu dimpa Kayak Nug baula ele tudita, nug medaku amge danab laa nug Kayak nai laa ii adate aria nug nakok hamu adom amu Kayak Nug amu edua adidku,” awa aum.

### *KAYAKNU DO MADOD ATEM DAAKU*

<sup>26</sup> Jesus Nug nai amu matiowa, Nug Kayaknu do madod atem daakunu amu inam matiom.

“Kayaknu do madod amuam danab nug e wanpa ebte bia.

<sup>27</sup> Nug epowa amu nug tuqanpa niiaya, amunpa nug udat laala haaha oiyye amu e nug ba, okai mete. Okai mete amge danab nug e amu atem ba okai mete nug ii doote.

<sup>28</sup> Nug udat laa heehe, wan nug nukā e itag medete, e amu bete. Tatam am udug, dimpa hadag qete amu dimpa nug meu ote.

<sup>29</sup> Aria meu wa oduē, meu awak haen aaku doum amunu danab nug meu aote,” awa aum.

<sup>30</sup> Nug anam anana amu Nug nai tudita aum. “Ig Kayaknu do madod am adi bia daate akunig. Ig nug am keeke adi laa ele ou aqat-ta, nug diig tutuku anidkunig? Am inam.

<sup>31</sup> Kayaknu do madod am ad mastet aeg epaeg bete amubia. Mastet aeg nug am e laa aeg bia iita. Nug aeg nakoknab amge danab nug wanpa ebte, nug bete.

<sup>32</sup> Nug ba, okai ma, dad oopanū e laa oh edadte. Edata, epeg ele okai daaegeg, ai laala ag nug logopa daateb,” awa aum.

<sup>33</sup> Haen oh Jesus Nug keeke danab ag dooteb ii dooteb ele ou aqata ipuanata, ag amelagpa matiom. Keeke ag doodpig ele amupa Nug nai elele tuditom.

<sup>34</sup> Nug nai amubia aakuib matiom amu Nug nuhikud ipunitak awak danab ele ag haen laala akaib daanna, Nug nuhig nai oh amu diig mehuqom.

### *JESUS NUG HE, KODKOD QAK IITA MEUM*

<sup>35</sup> Ded amu tueb me, aam noono Jesus Nug nuhikud ipunitak awak danab amelagpa aum. “Ig

ahat, Galelia le ameg matadta, laih gokunig,” awa aum.

<sup>36</sup> Awa a amu ag ahan, danab ah kudum uuadna, ub nakok, Nug ub amupa dayom ele amu, ub amupa ukaegeg, ub naunau laala ele oh gopig.

<sup>37</sup> Ag ukaegeg, ulah okainab heehe, le ameg nug kodkod huan qa, ub oopa noa, am bekunu heum.

<sup>38</sup> Le anam heehe amu Jesus Nug ub bitobpa udunpa niieye, nuhikud ipunitak awak danab ag Nug mad etan apig. “Ipunikak ihinig, ig mauhkunignu hetem, amu na amunu dab iite metem?” aon apig.

<sup>39</sup> Ag anam aeg amu Jesus Nug aha, ulah amegpa nug anam hemanu anana, le amegpa, “Na uuna, to etan daye!” awa aum. Nug anam a amu ulah nug iita me, le ele to eta, manin niiom.

<sup>40</sup> Nug anam ha amu Nug nuhikud ipunitak awak danab amelagpa aum. “Adinu ag badateb? Ag oolagpa genab iite dooteb?” awa aum.

<sup>41</sup> Nug anam a, nuhikud ipunitak awak danab ag nuhignu enanag doon, oolag ele otaie, ag aka aka apig. “Ulah le ele amu a ele danab imunu nai dim lamidtep amunu am atemun? Nug am aun?” aon apig.

## 5

### *JESUS NUG HE, DANAB OUDI NAU ELE ENA DAYOM*

<sup>1</sup> Aria ag gona, Galelia le ameg laih Gerasa wanpa eedpig.

<sup>2</sup> Eedna amu ag ub uun, wanpa noegeg, danab laa, nug oudi nau ele, matmatpanu Jesus gumita udiom.

<sup>3</sup> Nug hanhan matmatpa dayaya oi<sub>tom</sub> amu ag danab amu mud<sub>ipa</sub> o senpa ele qak<sub>aglag</sub>nu elele i<sub>ita</sub>.

<sup>4</sup> Ag haen kud<sub>um</sub> qagapig amge nug haen oh wagai ma, sen pak<sub>ua</sub>, baegpan adak<sub>nu</sub> keeke ele he aod<sub>tom</sub>. Danab laa nug danab amu adak<sub>unu</sub> elele i<sub>ita</sub>.

<sup>5</sup> Nug anam haaha, tuqan amun ele nug matmatpa oi<sub>tom</sub>, qaukopa ele oiyaya ga<sub>tom</sub>. Nug nuk<sub>a</sub> bedu menpa ele tuqat<sub>om</sub>.

<sup>6</sup> Anam da<sub>tom</sub> amunu haen amupa nug nakok uma dayaya, Jesus ant<sub>a</sub>, nug Jesus gumit<sub>a</sub> gok<sub>unu</sub> qaibad uk<sub>a</sub>, Jesus noobpa gateg qaun oum.

<sup>7-8</sup> Nug gateg qaun o amu Jesus Nug oudi nau, danab amupa dayom ele amu, nug amegpa, “Danab amu uuidna uke!” awa aum. Nug anam aum amunu danab amu nug ewa aum. “Jesus, na Kayak atannunab beka. Na da atem heid<sub>ku</sub>tnu hetem? Kayak onigpa da na amenpa gagatag atem. Na da guitak aib medame!” awa aum.

<sup>9</sup> Aria Jesus Nug oudi nau od met<sub>om</sub>. “Na onin aun?” Od mete amu oudi nau nug aum. “Ig am kud<sub>umnab</sub> amunu da onil, ‘Daup kud<sub>um</sub>,’” awa aum.

<sup>10</sup> Aum amunu oudi nau amu nug Jesus amegpa, “Ig wan imu uut gok<sub>unig</sub>nu aib ame,” ii daye daye unuqit<sub>om</sub>.

<sup>11</sup> Nug anam aawo, bo kud<sub>umnab</sub> qaukopa ameg laipu daanna, e laegeg,

<sup>12</sup> amu oudi nau ag Jesus unuqidna apig. “Ig lamig<sub>ku</sub>tnu dayeb amu lamigpe, bo bedulagpa notu!” aon apig.

13 Ag anam aeg amu Jesus Nug, “Anam heig! awa a, ag danab amu uun gona, bo bedulagpa nopig. Noeg amu bo ag oolna, huana gona, aben oola noakpa Galelia le amegpa nona, le lanana mauhpig. Bo amu, ahilag eb qak am 2000 anam.

14 Ag mauheg amu bo gumatak danab ag ahan gona, ab okai amu nuhig wan taliliak ele amupa keeke adi anidpig amu aeg doopig. Doona amu ag keeke amu anidkulagnu ahan gopig.

15 Ag gona, Jesus gumidna tena, ag danab amu dayeye anidpig. Nug hanhan oudi nau ele dayom amge haen amupa nug lamen ma, dab mak ena ele to eta dayom. Anam dayeye anidna, ag badapig.

16 Aria danab ag Jesus Nug danab oudi nau ele nuhignu atem heum amu anidpig ele amu, ag amunu matinna, bonu ele madipig.

17 Matieg, ag doona amu ag Jesus Nug ahilag wanpanu aha, laih gokunu apig.

18 Ag anam apig amunu Jesus Nug ubpa teete, danab oudi nau uuidpig ele amu, nug Jesus ele oh gokulahnu ii daye daye od metom.

19 Nug od metom amge Jesus Nug aum. “Iita, na edun, baenadpa gumadna gona, Nadi nahipnu oo doye amu nahippa adi heum ele amunu ape, doyeg!” awa aum.

20 Jesus anam aum amunu danab amu nug edua uka, Dekapolis apa ta, Jesus adi nuhigpa heum amu amelagpa matieye, ag nuhig nai doona, ag dab mak kudum aopig.

*JESUS NUG AHLAA NID AHINELE EHANATOM*

21 Aria Jesus Nug ubpa ta, Galelia le ameg matada, le laih waum. Wana, le ihipa dayeye, danab ah kuḍumnab gumidna gopig.

22 Ag anam daaegeg amu Juda dilag nai doyak lagnu iki danab laa onig Jairas, nug Jesus gumita uka, gateg qaun wa,

23 nug Jesus unuqita aum. “Nid ahin dahil nug mauhkun hete amunu na gona, epenpa adape, ena daakunu od medatem,” awa aum.

24 Nug anam a amu Jesus nug ele oh ukaehéh, danab ah laala kuḍumnab ag Jesus haputna, qataetan daaegeg gopig.

25 Amu ah laa apa dayom ele amu nug kalam qak ode mad tuelp oopa haen oh anidtom. Iita ii metom.

26 Nug dokta kuḍum gumata uka, men dodo oh nuhig hamu matom amge dokta ag nug ii ehaniteg, ode nuhig uka uka, okai meum aakuib.

27-28 Nug anam dayaya amu nug, “Jesus ode danab kuḍum bapalate, ena daateb,” naipulag amu doya, nug nuhig dab makpa, “Da lamén nuhigib nakok adakul amu da ena daakul,” aum amunu nug danab ah Jesus ele gopig amu ag oolagpa Jesus dimugpa gonana, Jesus gumita wana, lamén nakok adom.

29 Ade amu nuhig ode laipun iita me, nug amu doye,

30 Jesus Nug nuhig gagatag laa uke doya, Nug edua od matom. “Aun dahil lamén adom?” awa aum.

31 Nug anam a amu nuhikud ipunitak awak danab ag Nug amegpa apig. “Danab ah ameg nadi talilidna daateb amunu adinu na, ‘Aun adailom?’

aon a<sub>t</sub>em,” aon apig.

<sup>32</sup> Ag anam aeg amge Jesus Nug ahilag nainu dab ii me<sub>t</sub>om. Ii<sub>t</sub>a, Nug nee<sub>k</sub>a, aun heum amu anid<sub>k</sub>unu nee<sub>k</sub>a<sub>t</sub>a dayom.

<sup>33</sup> Dayeye amu ah nug, “Da nuhig lam<sub>e</sub>n a<sub>d</sub>ami amunu Nug dahilnu a<sub>t</sub>e,” dab mak<sub>p</sub>a anana, nug ba<sub>d</sub>a ha<sub>h</sub>a<sub>d</sub>a<sub>d</sub>a, Jesus noob<sub>p</sub>a wana, gateg qaun wa, keeke oh nuhig<sub>p</sub>a beum amunu oh miag Jesus ameg<sub>p</sub>a aum.

<sup>34</sup> Nug anam a amu Jesus Nug aum. “O a<sub>d</sub>el, na oot<sub>p</sub>a genab doome amunu na ena daa<sub>t</sub>em. O<sub>d</sub>e nahip male, na ena daa<sub>t</sub>em. Na ma<sub>d</sub>o<sub>d</sub> ele u<sub>k</sub>e!” awa aum.

<sup>35</sup> Jesus Nug anam ma<sub>t</sub>iaya dayeye, danab laala ag i<sub>k</sub>i danab Jairas, amu nug laug<sub>p</sub>anu u<sub>d</sub>in, Jairas ameg<sub>p</sub>a apig. “Na a<sub>d</sub>en mauhom amunu na ipuni<sub>t</sub>ak danab imu u<sub>d</sub>at baula aib me<sub>t</sub>ame,” aon apig.

<sup>36</sup> Ag nug ameg<sub>p</sub>a aegeg, Jesus Nug nai amu daug<sub>p</sub>a doya, Nug Jairas ameg<sub>p</sub>a aum. “Na aib ba<sub>d</sub>ame! Na oot<sub>p</sub>a genab doye!” awa aum.

<sup>37</sup> Nug anam anana amu Nug danab ah laa oh amu nuhi<sub>k</sub>ud ipuni<sub>t</sub>ak awak danab ele ag dim lamidmananu, “Aib,” aum. Amu oh oolag<sub>p</sub>anu nuhi<sub>k</sub>ud ipuni<sub>t</sub>ak awak danab ewam, Petrus, Jakobus amu Johannes ele aak<sub>u</sub>ib Jesus ele Jairas laug<sub>p</sub>a gopig. Jakobus Johannes ele, a am eamag.

<sup>38</sup> Ag gona, nug laug<sub>p</sub>a tenana, Jesus Nug qanak baag o<sub>k</sub>ai ahilag doyaya, mahi<sub>t</sub>ak kobol laala ele heegeg an<sub>t</sub>om.

<sup>39</sup> Nug anam an<sub>t</sub>a, lag oopa noa amu ag ame<sub>l</sub>ag<sub>p</sub>a aum. “A<sub>d</sub>inu ag inam henan gaate<sub>b</sub>? Nid ahin imu nug ii mauhom, nug ni<sub>i</sub>te,” awa aum.

<sup>40</sup> Nug anam aum amunu ag Nug imidpig amge Nug ag oh lamate, dimitim noeg, Nug nid ahin mameg, anig ele nuhikud ipunitak awak danab ewam ele ag aakuib diiate, nid ahin niimpa nopig.

<sup>41</sup> Ag nona, Jesus Nug nid ahin epeg ada, ag nailagpa aum. “Talita kumi.” Nai amu diig am inam. “Da atem, nid ahin, na ahe!”

<sup>42</sup> Jesus Nug anam a amu nid ahin nug pahanab aha oiyeye, danab ah ag nid ahin anidna, ag huanak otaina, dab mak kudum aopig. Nug am mad tuelp ele.

<sup>43</sup> Aria Jesus anam hewowa amu Nug ag danab laala amelagpa amananu, “Aib,” anana, ag nid ahin e metaglagnu ele aum.

## 6

### *PROPET NUG AB DIIGPA ONIG IITA*

<sup>1</sup> Anam hewowa, ded laa Jesus Nug apag diigpa gokunu ahe, nuhikud ipunitak awak danab ele ag oh gopig.

<sup>2</sup> Ag gona tena daanna, Metidpa Nug Juda dilag nai doyak laka ta, Kayaknu nai ipuanatom. Ipuanate amu danab ag doona, dab mak kudum aona apig. “Danab imu am atemun? Aun danab imu doyak imu oh metom? Nug atem ha udat laala danab haknu elele iita ele hete?”

<sup>3</sup> Nug am lag hak danab! Ig dootem, nug am Maria beka. Nug amakud am Jakobus, Joses, Judas, Simon ele. Amu nug apinkud amu ag ig ele iite daatem?” aon apig. Ag anam anana amu ag Jesus ele oolag laipu ii dayom.

<sup>4</sup> Ag oolag laipu ii dayom amunu Jesus Nug ag amelagpa aum. “Propet nug ab ohpa onig ele amge nug apag diigpa, nug tiilag laipu ele oolagpa amu nug laugpa ele amu nug onig iita,” awa aum.

<sup>5</sup> Ag nuhignu oolagpa genab ii doopig amunu apa Nug ode danab kudum ii bapalatom, laipu laipuib.

<sup>6</sup> Ag oolagpa genab ii doopig amunu Nug dab mak kudum awa, Nug ab amupanu aha, ab laalapa uka, Kayak nai mehuqom.

### *JESUS HE, IPUNITAK AWAK DANAB TUELP AG UDATPA GOPIG*

<sup>7</sup> Nug anam oiyaya amu Nug nuhikud ipunitak awak danab tuelp onilagpa e udieg, Nug adit adit maate, ag ab laalapa gokulagnu daaegeg amu Jesus Nug ag oudi nau lamadkulagnu gagatag mata,

<sup>8</sup> Nug ag amelagpa aum. “Ag hokat dud qaknu amu adaglagnu elele amge bret, batam, men dodo ele amuam aib aopig.

<sup>9</sup> Ag baelag gada lamem ele amu mekulag amge lamem adit amu aib mepig,” awa aum.

<sup>10</sup> Nug anam anana amu Nug nai baula tudita aum. “Ag gona, ab laapa danab laa laugpa tena, ag lag amupaib daanna, ukaknu haen beeb, ab amupanu ahan ukeg!

<sup>11</sup> Amge ded laa ag ab laapa tepeg, ab amupan danab ag diin, laka ii maadna, nai ahilag ele ii doopeg amu ag ahan, ab amu uunna, ag ab amupan danab ag ehed hepig dooglagnu, ag baelagpanu gapud qeqalpeg nad!” awa aum.

12 Nug anam aum amunu ag ahan gona, nai mehuqnana, danab ah oh ag hipuninnu oolag edukunu apig.

13 Anam henana amu ag oudi nau ele lamadnana, ode danab ag Kayaknu dab mekulagnu, ipunitak awak danab ag olipnu goden layadna unuqiteg, bedulag ena dayom.

### *HERODES ANTIPAS NUG LAYATAK JOHANES BAG OTADOM*

14 Amu Jesus Nug udat heehe, udatnu nai wan amu oh tone, king Herodes Antipas doynom. Doyeye, danab laala ag Jesusnu udat amu anidna doona ag, “Layatak Johanes mauhowa, nug edua hibaita oite amunu gagatag okai okai nuhigpa bete,” apig.

15 Ag anam apig amge laala ag, “Nug am Elias,” aegeg, laala ag, “Nug am propet, anuka propet daapig, amubia,” aon apig.

16 Laa ag anam apig amge Herodes Antipas nug anam doya, nug aum. “Imu am genab Layatak Johanes. Da nug baag otadmi amge Kayak Nug he, nug edua hibaitom,” awa aum.

17-18 Amu Layatak Johanes nug mani guitakpa ii dayom haenpa amu Herodes Antipas nug awag Pilip, nug wau Herodias adita awom. Awe amu Layatak Johanes nug Herodes Antipas amegpa, “Na awan wau aome, amupa na do tipalme, kobol amuam ena iita,” awa aum amunu Herodes Antipas nug a, nuhikud daup danab ag gona, Johanes epeg hipalna, aon gona, mani guitakpa mepig.

19 Johanes aum, diig amunu ele Herodes Antipas wau Herodias nug oo aeg be, nug Johanes qeeb mauhkunu heum amge elele iita.

20 Adinu? Herodes Antipas nug doynom, Johanes am Kayak noobpa danab tutuku, oiyak nuhig am ena amunu Herodes Antipas nug heeb mauhmanu bada, atog noum. Amu ded laala Herodes Antipas nug Johanes nai madikunu onigpa e udia, nai matie amu Herodes Antipas nug Johannesnu nai amunu dab mak kudum awom amge nug nai amu dookunu oo ele dayom.

21 Aria ag anam daanna, ded laa Herodias nug Johanes qekunu ib antom. Ded amupa Herodes Antipas nug nuhig menuak ded be, nug gabmannu iki danab amu daup iki danab amu Galelianu danab okai laala ele, ag nuhig menuak ded amunu gamag ahak hekulagnu hobul heum.

22 Haen amupa ag Herodes Antipasnu hobulpa daaegeg, Herodias adeg, lag oo amu oopa noa, ahi godede, Herodes Antipas adi ag nug anidna, ag itag aqe, Herodes Antipas nug aha, nug nid ahin amu amegpa nai gagatag qeta, inam aum. “Na adin oot hete? Na keeke laa aokutnu oot dayeb am da na medakul.

23 Na keeke dahil imu oh laih aokutnu oot dayeb amu da gamagpa opatpi, laih na aokut,” awa aum.

24 Nug anam a amu nid ahin nug aha, dimitim uka, nug keeke adi aokunu amu Herodes Antipas amegpa akunu anig od metom. Od mete amu anig nug aum. “Na Layatak Johanes iki medakunu ape doyaq!” awa aum.

25 Nug anam a amu nid ahin nug paha edua uka, Herodes Antipas amegpa aum. “Na geha iikunab

Layatak Johannes baag otadna, iki tapidpa mena, medakutnu ool daate,” awa aum.

<sup>26</sup> Nid ahin nug anam a amu Herodes Antipas nug oo ug okainab ele dayom amge nug tatam nai gagatag qeta aawo, do danab ag nug ele daapig amu ag ele nai amu doopig

<sup>27</sup> amunu nug paha nuhig daup laa amegpa, “Na gona, Johannes baag otadna, na nug iki aon do!” awa aum. Nug anam a, nuhig daup danab mani guitakpa uka, Johannes baag otada,

<sup>28</sup> nug iki tapidpa ma, awa udia, nid ahin mete, nug anig metom.

<sup>29</sup> Ag anam heeg amu Johannesnu ipunitak awak danab ag doon gona, Johannes gada aon gona boompig.

### *JESUS NUG DANAB 5000 E MATOM*

<sup>30</sup> Aria Jesusnu ipunitak awak danab ag edun udieg, ag Jesus ele qag mena, ag udat hepignu amu nai ipuanadpignu ele Jesus amegpa apig.

<sup>31</sup> Apa daaegeg, danab ah kudum ag ukak udiak heegeg, Jesus amu nuhikud ipunitak awak danab ele ag e lanaknu haen laa ii anidpig amunu Jesus Nug nuhikud ipunitak awak danab amelagpa aum. “Ahapeg gota, aben danab ii daatebpa amu ag apa hik nakok aweg!” awa aum.

<sup>32</sup> Jesus anam a amu ag ubpa tena, atu laih danab ii daatebpa gopig.

<sup>33</sup> Ag anam gopig amge apan danab ag Jesus nuhikud ipunitak awak danab ele anadna doona, ag ab ohpanu ahan, baelagpa tatam anuqna gona, aben Jesus adi gokulagnu gopig amupa ag tatam tepig.

34 Tena daaegeg amu Jesus Nug nuhikud ipunitak awak danab ele ag gona eedna, Jesus Nug danab ah kudum gona, aben amupa daaegeg anata, Nug ahilagnu oo doyom. Adinu? Ag am dod sipsip ag gumak danab iita, mauhnoak oiteb, amubia daapig. Nug oo doyak awa, Nug ag keeke kudum ipuanatom.

35 Ipuanateete aam no, nuhikud ipunitak awak danab ag Jesus gumidna dona, amegpa apig. “Imu am aben danab ii daateb ele. Aam ele nokun hete.

36 Amu danab ah imu ag e laa iita amunu na ape, ag ahan, danab laulagpa amu ab ab ele gona, e aon laig!” aon apig.

37 Ag anam aeg amu Jesus Nug aum. “Ag e madapeg laig!” awa aum. Awa a amu ipunitak awak danab ag apig. “Ehe, Ig gota, bret 1000 kina keeke anampa daden mekunigte? Ig men dodo amubia iitanab iita,” aon apig.

38 Ag anam aeg amu Jesus Nug aum. “Ag epelagpa e gane daate. Gona anteg!” awa aum. Awa a amu ag gona, matin anidna, ag edun dona, amegpa apig. “Bret kunum tanig ele amu kakai adit ele daate,” aon apig.

39 Ag anam aeg amu Jesus Nug ipunitak awak danab amelagpa aum. “Danab ah oh apeg doona, ag ameg ameg gikida enapa dayeg!” awa aum.

40 Nug anam a amu ipunitak awak danab ag aeg, danab ah anam daapig. Ameg laala eb qak 100, ameg laala eb qak 50. Ag anam daaeg ukom.

41 Ag anam daaegeg amu Jesus Nug bret tanig ele amu kakai adit ele diia ada, Nug hab atan neeka dayaya, unuqitom. Unuqitowa amu Nug

bret, kakai ele pane ne, ipunitak awak danab ag aon panin mataglagnu mate, ag danab ah mataeg,

<sup>42</sup> oh laeg, ag oolag ditie,

<sup>43</sup> e big dayom amu ipunitak awak danab ag aon, kaleg tuelp inaeg am beum.

<sup>44</sup> Danab e lapig ele amu ahilag eb qak am 5000.

### *JESUS LE BADEPA OIYOM*

<sup>45</sup> Ag e lana malaeg amu Jesus Nug nuhikud ipunitak awak danab amelagpa aum. “Da danab ah imu oh qatiglagnu abipi, ag ahan, ubpa tena, Galelia le ameg matadna, laih Betsaida ukeg!” awa aum.

<sup>46</sup> Nug anam a amu ag ahan ukaegeg, Jesus Nug danab ah amelagpa, “Enade ukeg,” awowa, Nug nuka amu unuqidkunu qaukopa teum.

<sup>47</sup> Ta dayeye, aam no, ipunitak awak danab ag ubpa, le ameg gamagpa ukaegeg, Jesus Nug nuka apa dayom.

<sup>48</sup> Anam dayeye amu ulah okai ub nob awe, edue laih gokunu heehe amu ipunitak awak danab ag el qak udat okai heegeg, Jesus anatom. Anate, waggadede butuanab Nug aha, le gada tapa, gumata uka, qe edata gokunu ukom amge ipunitak awak danab ag

<sup>49</sup> Nug anam le gadapa ugeke, ag anidna, “Umuam dotog,” anana, badan, huan epig.

<sup>50</sup> Ag oh anidna, ehed badaeg, Jesus Nug ag amelagpa aum. “Ag gagatag dayeg! Imu daib, aib badapig,” awa aum.

<sup>51</sup> Nug anam anana amu Nug ub atan oola te, ulah okai to etom. To ete amu ipunitak awak danab ag dab mak kudum aopig.

<sup>52</sup> Adinu? Ag Jesus bretpa kobol heum amu ag oolag ii maitom. Ag oolag ituak dayom. Jesus Nug ag atog noadkunu elele ii doopig.

<sup>53</sup> Aria ag le ameg matadna, Genesaret eedna tepig.

<sup>54</sup> Eedna teeg, haen amupanab amu apan danab ag Jesus anidna amu ag Nug idu doona,

<sup>55</sup> ag paha ab ohpa gona, aeg doona, ag ode danab diin, Jesus adepa dayom doona amu ag apa gumidna gopig.

<sup>56</sup> Amu Jesus Nug ab ab oiyeeye, ag ode danab diin, ab gamagpa maadna, ag Jesusnu lamen daugib adaglagnu unuqidna apig. Unuqidna aeg amu ode danab oh ag Jesusnu lamen adapig ele amu, ag adaeg, ag bedulag ena dayom.

## 7

### *KAYAKNU DO AM DANABNU DO EDIDTE*

<sup>1</sup> Aria amu dimpa do gumak danab-Parasia amu do mehuqak danab ele ag Jerusalemnu ahan, Jesus gumidna gona,

<sup>2</sup> Jesusnu ipunitak awak danab laala, ag Juda dilag do amupanab epelag ii ihapig, ag epelag hamu ihona, e lanan daaegeg anadpigi.

<sup>3</sup> Juda dilag do gumak danab-Parasia amu Juda danab laala ele ag epelag ii ihana, ag alalkad apig amubia, ag e ii lateb.

<sup>4</sup> O ag e odiak abenpanu edun, laka gona, ag haen amu ele ag epelag ii ihana amu ag e ii lateb. Ag do laala kudum amubia dim lamidteb, hai gokod ihaknu, wa ihaknu, amu tapid ihaknu ele.

<sup>5</sup> Anam hanhan hedapig amunu ag Jesusnu ipunitak awak danab epelag ii ihapig, e laeg anadna, ag Jesus amegpa apig. “Ipunitak awak danab nahipad ag epelag ii ihona, e lateb. Adinu ag alankad dilag kobol ii dim lamidteb?” aon apig.

<sup>6</sup> Ag anam aeg amu Jesus Nug ag amelagpa aum. “Anuka amu propet Jesaia nug ag ham bupuak danab, ahilagnu tutuku yom. Nai amuam inam. ‘Danab imu ag odelagpaib da binal meteb. Ag oolag amu uuida pidenab daate.

<sup>7</sup> Ag danab ah dilag do aakuib mehuqnana amu ag amunu, “Kayaknu do,” aon ateb amunu ag da hamu binal meteb.’

<sup>8</sup> Ag Kayaknu do uuidna, danab dilag do aakuib dim lamidteb,” awa aum.

<sup>9</sup> Jesus Nug anam anana amu Nug nai baula tudita aum. “Ag ahilag dab mak dim lamidkulagnu, Kayaknu do tabapeg nekunu doon aotna aoteb.

<sup>10</sup> Imu ante! Moses nug aum. ‘Na anin mamen ele binalah mena, ahilah nai dim lamite!’ Amu nuhig nai laa ele am, ‘Danab nug Kayak onig diia, anig mameg ele a nob nau aoglahnu aku amu ag qepeg mauhad!’”

<sup>11</sup> Moses nug anam aum amge ag inam ateb. ‘Danab laa nug moni laa anig mameg ehanatkunu ele amge nug a amelahpa, “Da moni imu Kayaknu tituanmi,” anana amu

<sup>12</sup> nug anig mameg ele ii ehanatma.’

<sup>13</sup> Ag ag alankad dilag donu anuqak doon dim lamidteb amupa ag heeg, Kayaknu do amu hamu bia daate. Ag keeke kudum amubia heteb,” awa aum.

14 Aria Jesus Nug baula danab ah kuḍum gu-midna goḱulag<sub>nu</sub> e, ag uḱaeg, Nug amelagpa aum. “Ag nai dahil tutuḱu doon, dab meṭan aotna aweg!

15 Keeke dimitimnu danab oopa noṭe ele, keeke amu danab oo dubuṭid ii medte. Iiṭa! Keeke danab dab makpa loḱumak dayaya, oḱepanu dimitim beṭe, amuam danab oo he, dubuṭid medte.

16 [Danab nug daug ele dayeb amu nug doyaḱ!] awa aum.]

17 Nug anam anana amu Nug danab ah ele uuata, laḱa uḱe, nuhiḱud ipunitak awak danab ag nai amu, Nug nai amupa keeke danab ag dooṭeb ii dooṭeb ele ou aḱata ipuanata maṭiom ele, nai amu diignu oḱ medapig.

18 Oḱ meṭaeg amu Jesus Nug aum. “Ag am danab laala ag dab mak iṭa biate amunu ag nai amunu diig ii dooṭeb? Ag doyeg! Dimitimnu keeke nug danab oopa noa heeb, danab amu nug oo dubuṭid ele ii daama.

19 Aḱinu? Danab nug e late amu e amu nug danab dab mak abenpa ii goṭe. Iiṭa, nug danab biigpa uḱe, biie goṭe,” awa aum. Jesus Nug anam aum amunu ig dooṭem. E oh lanaknu am enaib.

20 Aria Jesus Nug anam anana amu Nug nai baula tudita aum. “Ehed hak nau oh am danabnu dab makpa dig meṭe amunu keeke amu nug he, danab oo dubuṭid medte.

21 Genab kobol ehed imu oh danabnu dab makpanu beṭe, dab mak nau, gapai kobol diigdiig, yabhok kobol, danab qe mauhak kobol,

22 ameg ḱak kobol, oo nauha amya oiyak kobol, nai genab iṭa anak kobol, uḱa nak kobol, oo aeg bak kobol, danab laanu nai nau anak kobol, nuḱa

binag mak kobol amu ham bupuak kobol kudum laa ele.

<sup>23</sup> Kobol amu oh danabnu dab makpa dig men bena heeg, danab nug hipunin he, oo dubutid ele daate,” awa aum.

### *WANLAAPANAH NUG JESUSNU OOPA GENAB DOYOM*

<sup>24</sup> Aria dimpa Jesus nug aha uka, ab onig Taia heqopa, lag laapa ta, apa lokuma daakunu ha dayom. Amge danab laala ag Jesus udiom doopig amunu Jesus Nug lokuma ii dayom.

<sup>25</sup> Lokuma ii dayom amunu ah laa, nug adeg am oudi nau ele, nug Jesus apa dayom doya, nug paha gumita uka, Jesus noobpa gateg qaun oom.

<sup>26</sup> Ah amu nug am Grik ah. Nug Panisia wan, Siria gumapig ele amupa dayom. Nug Jesus gumita uka, Jesus Nug heeb, oudi nau nug adeg bedupa dayom amu uuidkunu ii daye daye od metom.

<sup>27</sup> Ah nug anam a amu Jesus Nug aum. “Ig nid naunau dilag bret aot, qai matagnig am kobol ena iita amunu nid naunau ag tatam lapeg, oolag ditiad!” awa aum.

<sup>28</sup> Awa a amu ah nug aum. “O Nadi, ena atem ge nid naunau ag bret lanana heeg, bret hupu nakok balalpanu na qete ele amu qai ag balal waapa daana lateb,” awa aum.

<sup>29</sup> Nug anam a amunu Jesus Nug ahnu oopa genab doyak okai ele anta, Nug aum. “Na ena ame! Na oot gamag ahebeb, lautpa uke! Oudi nau nug na aden uuitom,” awa aum.

30 Jesus anam a amu ah nug edua laugpa uka, nug adeg balalpa niieye antom. Oudi nau nug genab uuita ukom.

*JESUS NUG DANAB ODE, DAUG ELE ITUAK BABAITOM*

31 Dimpa Jesus Nug Taia heqopa dayom apanu aha noa, Saidon gamagpa noa uka, Dekapolis apa wana uka, le ameg Galelia apa noum.

32 Nug no amu danab laala ag danab daug ituak, nai elele ii madite ele Jesus topa omalna gona, Jesus ehanidkunu unuqidpig.

33 Unuqiteg amu Jesus Nug nukā danab amu omala, pide wana, epeg dodo danab daugpa me no, hunua, lemađu ađom.

34 Nug anam ha amu Nug hab atan neekeke, oo hik bopane, danab amegpa, “Epata,” aum. “Epata,” eduak am “Matulak daye!”.

35 Jesus Nug anam a amu danab amu nug daug paha matule, lemađu ele ug iita me amu nug nai ena matiom.

36 Aria Jesus Nug anam ha amu Nug aaku keeke amunu matimnanu do gagatag meum. Meum amge ag amu dim ii lamidpig. Iita. Ag gona, amunu madipig. Nug heum, amunu amananu Nug baubau, “Aib,” aum amge ag amu dim ii lamidpig. Iita. Ag tudidna, huana Nug heumnu madipig.

37 Ag Jesus heum anidna, ag huanak otaina, ag dab mak kudum aonna, ag apig. “Nug adi hete amu Nug enaib hete. Danab daulag ituak ele Nug he, ag nai dooteb amu danab odetup ele ag nai maditeb,” aon apig.

## 8

*JESUS DANAB 4000 E MATOM*

<sup>1</sup> Aria ded laa danab ah kudumnab ag Jesus gumidna gopig. Ag gona daaegeg, e iita amunu Jesus Nug ipunitak awak danab onilagpa e doeg Nug aum.

<sup>2</sup> “Da danab ah imu dilag ool doote. Ag dahilpa udieg, ig ded ewam imu aaku daamut. Ag e oh laaeg, iita me, gemu amu ag e iita.

<sup>3</sup> Laala ag umanu udipig amunu da e ii maten hepi, ag enug aqebeg gonana, ib manpa ag amelag qitineb, nena qekulag,” awa aum.

<sup>4</sup> Nug anam a amu nuhikud ipunitak awak danab ag apig. “Laih ipa amu danab ag ii daateb amunu ig bret adepa aognig?” aon apig.

<sup>5</sup> Ag anam aeg amu Jesus Nug od matom. “Ag bret gane apa daate?” awa aum. Awa a amu apig. “Bret eblaih adit ele daate,” aon apig.

<sup>6</sup> Ag anam aeg amu Jesus Nug danab ah oh ag hedep nena daaglagnu anana, Nug bret awa, bret amunu Kayak amegpa, “Ena hen mekame,” awowa, Nug pana, nuhikud ipunitak awak danab paniglagnu mate, ag panipig.

<sup>7</sup> Kakai nakok laipu laipu ele dayom amunu Jesus Nug amunu ele Mameg amegpa unuqitowa, paniglagnu ipunitak awak danab ele matom.

<sup>8</sup> Ag panieg, danab ah oh laeg, ag oolag ditie, e big dayom amu ipunitak awak danab ag aon inaeg amu kaleg eblaih adit am beum.

<sup>9</sup> Danab ah haen amupa e lapig ele amu eb qak ahilag 4000 anam.

<sup>10</sup> Ag e laeg, Jesus ag goꝓulagnu aum. Ag uꝓaegeg, Jesus Nug nuhiꝓud ipuniꝓak awak danab ele ag ub aꝓan tena, ab oꝓai onig Dalmanuta gopig.

<sup>11</sup> Jesus Nug uꝓa te, do gumak danab-Parasia laala ag Jesus adaglagnu ib anidꝓulagnu ag Nug gumidna gona, ag Jesus Nug hab aꝓannu eponak keeke, danab heꝓunu elele iita laa heeb anidꝓulagnu apig.

<sup>12</sup> Ag heꝓunu aeg amu Jesus Nug nai amunu nuꝓa gada tuꝓak bia doya, Nug aum. “Adinu gemun danab ag da eponak keeke, danab heꝓunu elele iita hepi anidꝓulagnu od medateb? Da gemu daateb imu amu ag anidꝓulagnu uꝓat amubia amu da laa ii hepa,” awa aum.

<sup>13</sup> Nug anam anana amu Nug uuata, ub aꝓan ta, le ameg Galelia matada laih ugeke, ipuniꝓak awak danab nuhiꝓud ag ele oh gopig.

### *YIS AM KOBOL NAU IPUNIGTENU NAI*

<sup>14</sup> Amu nuhiꝓud ipuniꝓak awak danab ag bret laa aon goꝓulagnu daulag atiom, laipuib am ubpa dayom ele amu aon gopig

<sup>15</sup> amu Jesus Nug ag amelagpa aum. “Ag do gumak danab-Parasia amu Herodes ele, amu dilag bret titidaknu keeke onig yis amunu dab meig!” awa aum.

<sup>16</sup> Nug anam a amunu ipuniꝓak awak danab ag aka aka apig. “Ig bret iita amunu Nug anam aum,” aon apig.

<sup>17</sup> Aon aeg amu Jesus Nug ahilag nai doya, Nug oopa guiꝓak doyaya, Nug aum. “Da bretnu ii ami. Ag amunu nai kuꝓum aib madipig. Ag da keeke hemi iite dooteb? Ag dab mak iitate?”

18 Ag dahil udatnu oolag maidkunu elele iitate? Ag udat amu daulag atiomte?

19 Ded laa da bret tanig ele panai, danab 5000 ag lana malaeg amu ag e hupu kaleg gane inaeg am beum?" awa aum. Awa a amu ag, "Tuelp" apig.

20 Anam aeg amu Nug aum. "Aria, ded laa da bret eblaih adit ele panai, danab 4000 lana malaeg amu ag e hupu kaleg gane inaeg am beum," awa aum. Awa a amu ag, "Eblaih adit ele," apig.

21 Ag anam aeg amu Jesus Nug aum. "Anam amu ag doyeg! Da bretnu ii ami. Da do gumak danab-Parasia amu Herodes ele, ahilag kobol ehednu ami," awa aum.

### *JESUS HE, DANAB AMEG GADUAK EDUA NEEKOM*

22 Aria ag ubpa gona, le daugpa eedna nona, gona Betsaida teeg, apan danab ag danab laa ameg nauhak ele omalna, Jesus gumidna gona, Nug danab amu bapaidkunu unuqidpig.

23 Ag unuqiteg amu Jesus Nug danab amu epegpa ada, omala ab dimitim uka, Nug wadu hune, danab amegpa no, Nug epeg danab bedupa ma od metom. "Na keeke laa anidtemte?" awa aum.

24 Jesus Nug od mete amu danab nug aum. "Ao, da danab anadtem amge tutukunab ii anadtem. Ag am ad bia anadtem," awa aum.

25 Nug anam a amu Jesus Nug epeg edua amegpa me, nug ameg ena daye, nug elele neekom.

26 Elele neeke amu Jesus Nug aum. "Na aib edun ab oopa gome. Na lautpa uke!" awa aum.

### *PETRUS NUG JESUS AM KRISTUS MIAG AUM*

27 Jesus Nug anam a amu ded laa nug nuhikud ipunitak awak danab ele ag ahan, ab nakok laa Sisaria Pilipai taliliak daapig amupa gopig. Ag gonana amu Jesus Nug od matom. “Danab ag dahilnu adi ateb?” awa od matom.

28 A amu nuhikud ipunitak awak danab ag apig. “Laa ag nahipnu, ‘Layatak Johanes,’ ateb amge laa ag, ‘Nug am Elias,’ ateb amu laa ag, ‘Nug am propet laa,’ aon ateb,” aon apig.

29 Anam aeg amu Jesus Nug aum. “Anam amge ag aka amu dahilnu adi ateb?” awa aum. Awa a amu Petrus nug aum. “Na am Kristus, Kayak Nug na tituanitom!” awa aum.

30 Petrus nug anam a amu Jesus Nug ag nuhignu danab laala amelagpa matimnanu do gagatag meum.

### *JESUS NUG ATEM MAUHKUNU DIG MA MATIOM*

31 Aria haen amupa Jesus Nug dig ma nuhigpa, Nug am Danab Bekalag, nuhigpa adi bekunu amu ipuanatom. Nug Juda iki danab, mana metak danab okai amu do mehuqak danab ele, ag Nug di metaglagnu, Nug guitak dookunu, mauhkunu, ded ewam ueeb edua hipaidkunu, keeke amu ohnu Nug dig ma, ipuanatom.

32 Nug miag atiak a amu Petrus nug omala, pide wana, dig ma daug batete,

33 Jesus Nug edua, ipunitak awak danab laa oh neekatata, Nug Petrus daug bata, amegpa aum. “Satan, na da dimulpa uke! Adinu? Na Kayaknu dab mak ii dim lamidtem,” awa aum.

34 Anam anana amu Nug danab ah amu nuhikud ipunitak awak danab ele ag onilagpa e udieg, Nug amelagpa aum. “Laa nug da dim lamidkunu oo

dayeb amu nug nuhig dab mak dim lamidkunu dab ii mema, nuhig ug amu mawa, da dim lamidad!

<sup>35</sup> Aria danab laa nug wanpan bau daakunu dab mak anuqak aote, dimpa nug bauklel hanhannu ii aoma amge danab laa nug dahilnu amu Nai Enanu ele anuqak doote, nug wanpanu bau dayak amunu anuqak ii doote amu nug am bauklel hanhannu aoku.

<sup>36</sup> Danab nug wanpan keeke oh aote amge nug bau dayak hanhannu ii aote amu keeke amu nug atem ehanidku?

<sup>37</sup> Nug adi keekepa bau dayak hanhannu daden meku?

<sup>38</sup> Aria danab laa nug wan imupan hipunin danab, ag kobol ehed laala kudum heteb ele amu, nug ag oolagpa oiyaya, nug dahilnu, dahil nainu ele uda neeb amu dimpa da Kayaknu gagatag ele amu nuhikud engel ele edut udit, haen amupa danab amunu da ele udal neku,” awa aum.

## 9

<sup>1</sup> Jesus Nug anam anana amu Nug nai baula tudita aum. “Da genab atem. Danab laala gemu ipa hipaidna daateb ele amu ag paha ii mauhmana. Iita. Tatam Kayaknu do madod gagatag ele dig ma beeb anidna mauhkulag,” awa aum.

### *JESUS BEDU EDUOM*

<sup>2</sup> Aria ded eblaih laipu uue amu Jesus Nug Petrus, Jakobus, Johanes ele omalata, qauko okai laapa te, ag aka daapig. Apa daanna amu Jesus Nug bedu eduom.

<sup>3</sup> Bedu edue amu nuhig lamen ele hakabnab epom. Wan imupanu danab laa nug lamen heeb, hakab amubia bekunu elele iita.

<sup>4</sup> Jesus Nug anam dayeye amu Elias Moses ele a tulai doeh, Jesus ele nai madipig.

<sup>5</sup> Anam daaegeg amu Petrus nug Jesus amegpa aum. “Ipunitak danab, ig aben imupa daagnignu am enanag amunu na ape, ig peh ewam buugnig. Nahip laipu, Mosesnu laipu amu Eliasnu laipu ele,” awa aum.

<sup>6</sup> Adinu nug anam aum? Ag badan daanna, nai laa anak iita amunu Petrus nug nai amu aum.

<sup>7</sup> Ag anam daaegeg amu lombig laa ag tonatete, lombig oopa baag laa inam a doopig. “Imu am nid dahil, da nuhignu ool huanak mauhte. Ag nuhig nai doyeg!” awa aum.

<sup>8</sup> Baag anam doona amu ag pahanab nekeg ugeke amu ag danab laa ii anidpig. Jesus nuka ag ele daanna anidpig.

<sup>9</sup> Ag anam anteg amu Jesus Nug ag ele ahan, qauko uun nonana, Jesus Nug ag kobol amu anidpig ele, ag amunu danab laa amegpa paha amananu do gagatag meum. Nug, Nug am Danab Bekalag amu, Nug tatam edua hibaiteb ag matiglagnu aum.

<sup>10</sup> Jesus Nug anam a amu ipunitak awak danab ag nai amu aona, aka aka apig. “Edua hibaitak nai am adi nai?” aon apig.

<sup>11</sup> Ag aka aka anam anana amu ag Jesus od medapig. “Adinu ihinig do mehuqak danab ag, ‘Elias nug tatam udieb, dimpa Kristus udiku,’ ateb?” aon apig.

12 Ag anam aeg amu Jesus Nug aum. “Ag, ‘Elias nug tatam u<sub>d</sub>ia, keeke oh bapaidku,’ a<sub>t</sub>eb amu ag genab a<sub>t</sub>eb amge ag Kayak nai laa ele dab mekulag. Nai amuam inam. ‘Danab Bekalag da, da guitak doopi, gedilkulag.’

13 Elias nug matu u<sub>d</sub>iom amu ag nuhignu ehed hek<sub>l</sub>ag<sub>n</sub>u oolagpa dayom, yak niite amubianab ag hepig. Nai amunu niiom bia hepig amunu danab bek<sub>l</sub>ag<sub>n</sub>u nai amu ele am anam beku,” awa aum.

*NID LAA OUDĪ NAU ELE AMU JESUS OUDĪ AMU LAMITOM*

14 Jesus Nug nuhikud ipunitak awak danab ewam ele ag anam anana amu ag nuhikud ipunitak awak danab laa gumadna gona, ag danab ah kudum qag mena daaegeg anadpig. Do mehuqak danab laala ag Jesusnu ipunitak awak danab ele awa awa qetak nai madipig.

15 Danab ah kudum ag Jesus anidna, ag o<sub>t</sub>aina, ag ahan gumidna gona, “Aaku u<sub>d</sub>ime,” apig.

16 Anam aeg amu Jesus Nug ipunitak awak danab apa daapig ele amu o<sub>d</sub> matom. “Ag keeke a<sub>d</sub>inu do mehuqak danab ele nai aeg ona aeg do<sub>t</sub>e?” awa aum.

17 Nug anam a amu danab ah kudum oolagpan danab laa nug Jesusnu o<sub>d</sub> mak nob ma aum. “Ipunitak danab, nid dahil nug ou<sub>d</sub>i nau ele, nai matiaknu elele i<sub>i</sub>ta amunu da awe, na gumite u<sub>d</sub>imi.

18 Haen kudum ou<sub>d</sub>i nau amu nug he, nid dahil nug wanpa na qa, hipadu neene, nug aeg ganudada, be<sub>d</sub>u ele tai edate. Amunu da nahipad ipunitak awak danab ou<sub>d</sub>i nau amu lamidkulag<sub>n</sub>u o<sub>d</sub> matami amge ag elele i<sub>i</sub>ta,” awa aum.

19 Danab nug anam a amu Jesus Nug aum. “Ag oh oolagpa genab doyak iita. Da ag ele haen elab daamut amge ag dahilnu oolagpa genab ii dooteb amunu da ool ug ele. Ag haen ganeb ag dahilnu oolagpa genab dooglag? Ag nid amu omalna dahilpa doig!” awa aum.

20 Nug anam a amu ag nid omalna, Jesus topa waeg, ouđi nau nug Jesus anta, nug paha he, nid nug bedu hahadede, na qa wanpa niiaaya, itodieye, hipadu neum.

21 Anam heehe amu Jesus Nug nid mameg od metom. “Nid imu nug inam hete ele amu, haen adekupanab dig meum?” Awa a amu nid mameg nug aum. “Nug nid nakokpa imu dig meum.

22 Haen kudum ouđi nau nug nid imu heeb mauhkunu he, ab adupa o lepa na qete amunu na elele dootem dayeb amu na ihinihnu oo doyak doona ehanite,” awa aum.

23 Nug anam a amu Jesus Nug aum, “Da hekulnu elele amge na amunu ootpa genab dootemte? Danab nug oopa genab doyak ele amu nug keeke oh hekunu elele,” awa aum.

24 Jesus Nug anam a amu nid mameg nug aum. “Da oolpa genab nakokib dootem amge na hepe, okai bad!” awa aum.

25 Nug anam a amu Jesus Nug danab ah kudum qag meeg anta, Nug ouđi nau amegpa, “Ode ituak, daug ituaknu ouđi nau, na nid imu padaidna gona, bau edun nug bedupa aib udime!” awa aum.

26 Jesus Nug anam a amu ouđi nau nug gayowa, nug nid huan udala, uuita ukom. Ugeke amu nid nug mauhak bia niieye, danab laala kudum ag,

“Nug mauhom,” apig.

<sup>27</sup> Ag anam apig amge Jesus Nug nid epegpa ade, aha hibaitom.

<sup>28</sup> Aria dimpa Jesus Nug laka uke, nug nuhikud ipunitak awak danab ele daanna, ag Nug od medapig. “Adinu ig oudi nau amu lamidkunignu elele iita?” aon apig.

<sup>29</sup> Aon aeg amu Jesus Nug aum. “Laa nug oudi nau imubia ib laapa ii lamidma. Iita. Unuqitakpa aakuib,” awa aum.

### *JESUS NUG BAULA ATEM MAUHĶUNU AUM*

<sup>30</sup> Ag anam hewona amu ag ahan nona, Galelia wanpa Kapenaum gokulagnu gonana, Jesus Nug danab laala nug anidkulagnu oo ii dayom.

<sup>31</sup> Adinu? Nug nuhikud ipunitak awak danab nuhignu inam ipuanatata aum. “Danab Bekalag da amu danab laa nug da danab epelagpa meideb, ag hepeg, mauhkul. Mauhoya amu ded ewampa da eduen hipaidkul,” awa aum.

<sup>32</sup> Nug anam a amu ag nai amunu oolag tutuku ii maitom amge ag Jesus Nug nai amu mehuqkunu od metaglagnu badapig.

### *AUN KAYAK AMEGPA OKAI DAATE*

<sup>33</sup> Ag gona, Kapenaum tena, laka daanna amu Jesus Nug od matom. “Ig ibpa oitta amu ag adi keekenu madipig?”

<sup>34</sup> Nug anam od mate amu ag ibpa, aun ag oolagpanu am okai dayom amu madipig amunu ag Jesusnu od mak amu nob ii mepig.

<sup>35</sup> Ag anam heeg amu Jesus Nug ag onilagpa e doeg, Nug aum. “Danab laa nug anuqak daakunu

oo dayeb amu nug danab laala oh waalagpanab dayaya, ahilag udat nid dayad!” awa aum.

<sup>36</sup> Nug anam anana amu Nug nid nakok laa awa, ag oolagpa me, hibaita dayeye, odokia aum.

<sup>37</sup> “Danab laa nug da onilnu nid nakok laa imubia oo meta humidte amu nug da oo meda humidte. Amu laa nug da oo meda humidte amu nug daib ii humidte. Iita. Nug da Mamel ele oo meta humidte,” awa aum.

### *EHANITAK KOBOL AM NOB ENA ELE*

<sup>38</sup> Jesus Nug anam a amu Johannes nug Jesus amegpa aum. “Ipunitak danab, ig danab laa nug na oninpa oudi nau lamate anidmut amge nug am ig dim lamike ii oitem amunu ig nug oudi nau lamadmanu do memut,” awa aum.

<sup>39</sup> Awa a amu Jesus Nug aum. “Danab nug udat okai amubia da onilpa hete ele amu nug paha dahilnu nai ehed laa akunu elele iita amunu ag nuhig udat amu aib okulpig.

<sup>40</sup> Adinu? Danab nug ihinig keked iita amu nug am ig lainig.

<sup>41</sup> Anteg! Aun nug ag anata, ag am dahilad amunu nug ag ehanata, le ougib hai gokodpa madata amu Kayak Nug danab amu nob ena medaku, Nug daug iinab atima.

### *LAA HE, HIPUNIN HAKNU NAI*

<sup>42</sup> Amge danab laa nug nid nakok laa, nug dahilnu oopa genab doote ele amu, nuhig oopa genab doyak heeb aib nauhom. Nug anam heku am naunab. Nug ii heum haenpa danab ag nug baagpa men qakan, maopeg yupa noa mauhlo amuam nakok nau amge nug dayaya, nid nakok

laanu oopa genab doyak heeb nauhku, amuam naunab nau.

<sup>43</sup> Na epen amu nug na hipunin hekutnu eedidte dayeb amu na epen laih amu okule! Na epen laihigib ele daanna, na haen oh bauklel daakut, amuam ena. Amge na epen adit oh ele daakut amu ag na aben ehedpa mawidpeg gokut amuam ena iita. Apanu ab amu nug ii qauhte.

<sup>44</sup> [Ge! Apa amu gauat ag ii mauhteb amu ab ele nug ii qauhte.]

<sup>45</sup> Amu na baen nug na hipunin hekutnu eedidte dayeb amu na baen laih amu okule! Na baen laihigib ele daanna, na haen oh bauklel daakut amuam ena. Amge na baen adit oh ele daakut amu ag na mawidpeg, aben ehedpa gokut amuam ena iita.

<sup>46</sup> [Apa amu gauat ag ii mauhteb amu ab ele nug ii qauhte.]

<sup>47</sup> Laa ele amu na amen nug na hipunin hekutnu eedidte dayeb amu na amen laih amu kehan, maope ukad! Na amen laipuib ele hab abpa gokut amuam ena. Amge na amen adit oh ele daanna, aben ehedpa gokut amuam ena iita.

<sup>48</sup> Apa amu gauat ag ii mauhteb amu ab ele nug ii qauhte,” awa aum.

<sup>49</sup> Yu ab ele am nakok udat laipu bia hetep amu Jesus Nug nai baula tudita aum. “Ab nug keeke laala ewe, opia awak daate. Yu kalu amu nug ele anam. Aria ag da dim lamidteb ele amu ded laala ag ug anidkulag. Ug amuam yu kalu ewak bia. Nug heeb, ag elele oiglag.

<sup>50</sup> Yu kalu am keeke ena amge nug yu ubuhi iita

dayeb amu a<sub>tem</sub> heput, nug e<sub>dua</sub> ubuhi ele daa<sub>ku</sub>? Dahil nai am yu kalu ena, nuhig ubuhi ii i<sub>ita</sub> meum ele, amubia amunu ag dahil nai tutu<sub>ku</sub> doonna, ag hanhan ma<sub>od</sub> daanna oiye<sub>g</sub>!” awa aum.

## 10

### *NUG AWAK OTADAKNU NAI*

<sup>1</sup> Jesus anam ana mala amu Nug Kapenaumnu aha u<sub>ka</sub>, Juda wan laa Jodan le laih dayom ele amu apa u<sub>kom</sub>. U<sub>ka</sub> apa dayeye amu danab ah ku<sub>dum</sub> ag Nug gumidna u<sub>kaeg</sub>, Nug kobol hanhan he<sub>tom</sub> amubia ag amelagpa Kayak nai ipuana<sub>tom</sub>.

<sup>2</sup> Haen amupa amu do gumak danab-Parasia ag Jesus gumidna gona, Nug inam o<sub>d</sub> medapig. “Thinig do<sub>pa</sub> amu danab laa nug ah nuhig lamite<sub>b</sub> go<sub>ku</sub> am enate o ena i<sub>itate</sub>?” aon apig. Ag Jesus a<sub>d</sub>aglagnu ib anid<sub>k</sub>ulagnu anam o<sub>d</sub> medapig.

<sup>3</sup> Ag anam o<sub>d</sub> me<sub>taeg</sub> amu Jesus Nug o<sub>d</sub>elagpa awa, o<sub>d</sub> ma<sub>tom</sub>. “Keeke amunu amu Moses nug do a<sub>tem</sub> meum?” awa aum.

<sup>4</sup> Nug anam a amu ag apig. “Moses nug inam aum. ‘Danab laa nug wau lamid<sub>k</sub>unu oo dayeb amu nug nai amu u<sub>dugpa</sub> ya, wau me<sub>towa</sub>, lamite<sub>b</sub> go<sub>ku</sub>,’ ” aon apig.

<sup>5</sup> Ag anam aeg amu Jesus Nug aum. “Ao, amge ag am oo doyak ele ii doote<sub>b</sub> amunu ag ah ug o<sub>kai</sub> ma<sub>tamnanu</sub>, ag hamu lamadmananu, Nug do bau, ag geha i<sub>iku</sub> amunu apig amu meum.

<sup>6</sup> Amge tatam keeke oh heum haenpa amu anam i<sub>ita</sub>. Haen amupa Kayak Nug a<sub>di</sub> heum amu danab laa nug amunu inam yom. ‘Kayak Nug danab ah ele hatom,’

<sup>7</sup> amunu diig amunu danab nug anig mameg ele uuata, nug wau ele ou qeya,

<sup>8</sup> adit amu a bedulah laipu daaglah. A anam heya, a baula adit iita. A am bedulah laipu.

<sup>9</sup> Aria ag doyeg! Danab ah ele a nug aotep amu Kayak Nug nuka matulatom amunu danab laa nug amu aib otadom,” awa aum.

<sup>10</sup> Nug anam a amu Nug nuhikud ipunitak awak danab ele ag ahan, laka gona, ag Jesus nai amunu od medapig.

<sup>11</sup> Od metaeg amu Nug ag amelagpa aum. “Danab laa nug ah nuhig lamitowa, nug ah bau aote amu danab amu nug gapai kobol hete.

<sup>12</sup> O ah laa nug danab nuhig lamitowa, nug danab bau aote amu ah amu nug gapai kobol hete,” awa aum.

### *JESUS NID NAUNAU ELE*

<sup>13</sup> Aria danab ah ag nid naunau omaladna, Jesus Nug epeg bedulagpa ma, ititak madakunu gumidna ukaeg amu Jesusnu ipunitak awak danab ag anadna, laa nid omaladna udipig ele amu aladpig.

<sup>14</sup> Ag alategeg, Jesus Nug anata, kobol hepig ele amunu nug oo nauhe, amelagpa aum. “Danab ag nid naunau bia daateb, ag am Kayaknu do madod oopa daateb amunu ag nid uuadpeg, dahilpa doig! Ag ib ahilag aib oo nepig.

<sup>15</sup> Da genab ag amelagpa atem. Danab nug Kayaknu do madod nid nakok aote amubia ii aoku amu nuhignu ib laa iita,” awa aum.

<sup>16</sup> Nug anam anana amu nug nid naunau odakiata, epeg bedulagpa ma, ititak matom.

*DANAB BAU ENUB OKAI ELE JESUS GUMITA UKOM*

<sup>17</sup> Jesus Nug anam ha mala amu Nug ibpa ugeke, danab laa nug qaibaḍ Jesus gumita uka, Jesus baegpa gateg qaun wa aum. “Ipunitak danab ena, da bauklel hanhannu aokulnu amu da atem hekul?” awa aum.

<sup>18</sup> Nug anam a amu Jesus Nug aum. “Kayak Nug nuka am ena amunu na dahilnu, ‘Danab ena,’ ame amu na nai amunu tatam dab mewona ame, o iita na hamute ame?”

<sup>19</sup> Amge nahip od maknu amu na do oh dootem. Na gapai kobol aib heme. Na danab aib qepe mauhom. Na yabhoi aib heme. Na danab laanu ham bupuak nai aib matime. Na kobol ham bupuakpa keeke aib aome. Na anin mamen ele odelah dim lamidna binalah me!” awa aum.

<sup>20</sup> Jesus Nug anam a amu danab amu Nug aum. “Ipunitak danab, da nid nakok dayeye, do amu oh dim lamiti udie, gemu ele anamib hetem,” awa aum.

<sup>21</sup> Awa a amu Jesus Nug danab amunu dab mak awa, nuhignu oo mauhe amu nug amegpa aum. “Keeke laipunu amupaib na elele iita. Na gona, na enun oh mepe, danab laala daden mepeg, na men dodo amu oh aon, dadek danab matona, na hab atan enun okai ele daakut. Na anam hewona amu na edun da dim lamide!” awa aum.

<sup>22</sup> Jesus Nug anam a amu danab amu nug nai amunu idu tigugude, nug edua, oo ug ele ukom. Adinu? Nug enub kudum ele.

<sup>23</sup> Nug ugeke amu Jesus Nug edua, ipunitak awak danab nuhikud ag amelagpa aum. “Danab ag

enulag kuḁum ele amu ag Kayaknu ḁo maḁoḁ oopa goḁulagnu am ug okai ele,” awa aum.

<sup>24</sup> Jesus Nug anam a amu nuhiḁud ipuniḁak awak danab ag nai amu doon, dab mak kuḁum aweg anaḁa amu Nug ag amelagpa aum. “O nid naḁud, Kayaknu ḁo maḁoḁ oopa goḁunu am ug ele.

<sup>25</sup> Doḁ laa onig kamel nug koitaknu tutui gidopa noḁunu am ug ele amge danab nug enub kuḁum ele amu, nug Kayak ḁo maḁoḁ oopa goḁunu am ugnab ele,” awa aum.

<sup>26</sup> Jesus anam a amu nuhiḁud ipuniḁak awak danab ag oḁainna, aḁa aḁa apig. “Anam dayeb amu aun nug bauklel aokunu elele?” aon apig.

<sup>27</sup> Aon aeg amu Jesus Nug tutuḁu neeḁaḁa aum. “Danab ag aḁa elele iḁa amge Kayak Nug anam bia ii daḁe. Kayak Nug keeke oh heḁunu elele,” awa aum.

<sup>28</sup> Jesus Nug anam a amu Petrus nug aum. “Ig ihinig keeke oh uut, na dim lamidḁem,” awa aum.

<sup>29</sup> Awa a amu Jesus Nug eḁua ag oh amelagpa aum. “Da genab ag amelagpa aḁem. Danab laa nug dahilnu amu dahil Nai Enanu ele ha, nug anig, mameg, amag, awag, apinag, nug wau, beḁod, adeḁud, nug laug amu nuhiḁud dad ele uuaḁa, da dim lamidḁe,

<sup>30</sup> nug geha haen imupa hamu ii daama. Iḁaḁa Nug awakud, amaḁud, apinḁud, anikud, nid nau-nau amu dad ele tudḁa, wan handat baula aokḁu. Laa ele amu danab laala ag qaḁaiḁak kuḁum meḁaglag amge nug bau hanhan aokḁu.

<sup>31</sup> Amge danab kuḁum anuḁak daḁeb amu ag dim daaglag. Am kuḁum laa ag dim daḁeb amu ag anuḁkulag,” awa aum.

### *JESUS NUG BAULA ATEM MAUHKUNU AUM*

<sup>32</sup> Amu ag Jerusalem gokulag<sub>nu</sub> ibpa gonana amu Jesus Nug anuqa ugeke, ipunitak awak danab ag dab mak kudum aonna, dim lamidpig. Danab laala Jesus dim lamidpig ele amu, ag ahilagpa adi bekunu badanna, dim lamidna gopig. Anam gonana amu Jesus Nug nuhikud ipunitak awak danab ag onilagpa e, gumidna ukaeg, Nug diiata, pide wana, nuhigpa keeke adi beku amunu amelagpa inam aum.

<sup>33</sup> “Doyeg! Ig gemu iiku Jerusalem gotem. Goput, laa nug Danab Bekalag da, mana metak danab okai amu do mehuqak danab ele ag epelagpa meideb, ag da hetodiakpa meidna, iupeg mauhkulnu nai qakana, ag da iita adi epelagpa meidkulag.

<sup>34</sup> Meidpeg amu iita adi ag aon aon iuna, wippa ehed matadilna, hunu iuna, iupeg mauhpi, ded ewam ueeb amu da eduen bau ahakul,” awa aum.

### *JAKOBUS JOHANES ELE OKAI DAAGLAHNU JESUS OD MEDAPID*

<sup>35</sup> Amu dimpa Sebedi bekod Jakobus, Johannes ele, a Jesus gumidya goya apid. “Ipunitak danab, na ihinihnu keeke laa hekutnu oonih daate,” aoya apid.

<sup>36</sup> Anam aeh amu Jesus Nug od matom. “Da ahilahnu adi hekulnu oolah daate?” awa aum.

<sup>37</sup> Awa a amu a apid. “Ioonih inam daate. Dimpa na okai daanna, wan imu oh gumanna, na ape, i amu na heqon laih laih daagnih. Laa na heqon nadiapa dayebbeb, laa na heqon nanehpa daaku,” aoya apid.

<sup>38</sup> A anam aeh amu Jesus Nug a amelahpa aum. “A atep amu a keeke amu ii dootep. Keeke ehed laa da tonidku, keeke amuam le mua bia, a le mua amu, da lakul amubia lakulahnu elelete?” awa aum.

<sup>39</sup> Awa a amu a apid. “I am elele!” A anam aoya aeh amu Jesus Nug aum. “Genab le mua ele, da lakul amu a ele lakulah

<sup>40</sup> amge aun nug da heqol nadiappa daaku, aun nug da heqol nanehpa daaku amu da akulnu elele iita. Da Mamel Kayak Nug aben adit amu aunnu babaitom amu a aakuib amupa daaglah,” awa aum.

<sup>41</sup> Jesus, Jakobus, Johannes ele ag anam matiegeg amu ipunitak awak danab eblaih tanig ele laa ag doona, ag Jakobus, Johannes ele ahilahnu oolag nauhom.

<sup>42</sup> Oolag nauhe amu Jesus Nug ag oh onilagpa e, gumidna doeg, Nug ag amelagpa aum. “Ag dooteb, wan imupan danab ah oh ag danab okai waalagpa daateb amu danab okai ag do adi meteb amu danab ah ag amuib dim lamidteb.

<sup>43</sup> Amge kobol amu ag oolagpa aib dayom. Iita. Danab laa nug ag oolagpa okai daakunu oo dayeb amu nug ahilag ehanitak dayad!

<sup>44</sup> Amu ele danab laa nug ag oolagpa anuqak daakunu oo dayeb amu nug ahilag begbeg dayad!

<sup>45</sup> Ag anam hekulagnu diig amu Danab Bekalag da, da wan imupanu danab ah ag da ehanidkulagnu ii udimi. Iita! Da ag ehanadkulnu udimi amu da dahil mauhakpa danab ah kudum bauklel hanhannu aoglagnu ele udimi,” awa aum.

*JESUS HE, BATIMIAS EDUA NEEGKUNU ELELE*

*DAYOM*

46 Ag ibpa gona, Jeriko apa tena, Jesus Nug nuhikud ipunitak awak danab amu danab ah laala kudum ele ag Jeriko edidna ukæeg, Timon beka Batimias, nug ameg gaduak amu, nug apa ib daugpa dayaya, danab men dodo keeke, metaglagnu unuqadtom.

47 Nug unuqata dayaya amu nug, “Nasaret ted Jesus udite,” doya, nug huanak ewa aum. “Dawit beka Jesus, na dahilnu oot gai iita doye!” awa aum.

48 Nug anam aawo amu danab laala kudum ag aidna apig. “Na oden qamute!” aon apig amge nug nai amu ii doya, baula huanak ewa aum. “Dawit beka, na dahilnu oot gai iita doye!” awa aum.

49 Nug anam eewo, Jesus Nug doya amu Nug hibaita dayaya, amelagpa aum. “Ag onigpa epeg doad!” awa aum. Nug anam a amu ag danab ameg gaduak ele amegpa apig. “Na oot gamag ahad! Na Nug gumidna gokutnu aum amunu na ahan wa!” aon apig.

50 Ag anam aeg, nug doya, nug lamén ulahnu udowa, paha aha, Jesus gumita waum.

51 Nug gumita wa amu Jesus Nug od metom. “Da nahipnu adi hekulnu oot daate?” awa aum. Awa a amu nug aum. “Ipunitak danab, na hepe, da neegkulnu ool daate,” awa aum.

52 Danab nug anam a amu Jesus Nug aum. “Na dahilnu ootpa genab doome amunu na neegkutnu elele. Enad uke!” awa aum. Nug anam a amu pahanab danab amu nug neekunu elele dayom amunu nug Jesus ibpa dim lamitom.

# 11

## *JESUS DONKI ATAN TA JERUSALEM UKOM*

<sup>1</sup> Aria ag gona, Jerusalem gukuidna, ag Betani, Betpasi, Olipnu Qauko ele guguitak apa, Jesus Nug ipunitak awak danab adit amelahpa aum.

<sup>2</sup> “A goya, ab nakok miag amupa teya, apa ab daugpa a donki nag laa nakok okai meum qakak daate ana anidkulah. Donki amu nug bau, danab laa nug atan ta ii oiyom. Anidya amu uhuqya, aoya udied!

<sup>3</sup> A anam hebeped amu danab laa nug, ‘Adinu a anam hetep?’ ab amu a inam aid! ‘Nadi Nug donki imunu udat ele. Haen elabnu iita. Nug paha edua meeb udiku.’ A anam aid!” awa aum.

<sup>4</sup> Jesus Nug anam a amu a goya, donki bau ab oopanu ibpa lag odpa qakak dayeye anidpid. Anidya amu a uhuqehh,

<sup>5</sup> danab laala ag guguitak daanna, ag od matapig. “Adinu a donki amu uhuqtep?”

<sup>6</sup> Od mataeg amu a Jesus aum Nug ode bia aeh amu ag, “Ena,” aon apig.

<sup>7</sup> Ag anam aeg, ipunitak awak danab adit a donki amu aoya, Jesus gumidya ukah, ag lamen ulahnu donki gomepa duqeg, Jesus Nug donki atan teum.

<sup>8</sup> Ta dayeye amu danab kudum ag ahilag lamen ulahnu ib manpa duqaegeg, laala ag ad epeg okulna, ib manpa mepig.

<sup>9</sup> Anam duqegeg, Jesus ugeke, amu danab laala ag anuqna, Jesus noobpa ukaegeg, laala ag Jesus dim lamitegeg amu ag oh enan apig. “Ig Kayak onig humatu! Danab imu Nug Kayak onigpa udite, Kayak Nug itidte.

<sup>10</sup> Danab imu Nug ig alanig Dawit dayom amubia daakunu udite amu Kayak Nug itidte. Kayak, Nug atan daate ele amu, ig Nug onig humatu!” aon apig.

<sup>11</sup> Ag gona, Jerusalem tena amu Jesus Nug Juda dilag mana metak lag oopa noa, keeke oh anata malowa, tueb meum amunu Nug nuhikud ipunitak awak danab ele ag edun, Betani gopig.

*JESUS NUG DANAB MANA METAK LAKA EHED HEPIG AMU LAMATOM*

<sup>12</sup> Aria ded amu dimpa, butua amu ag Jerusalem gokulagnu Betaninu ahan ukageg, Jesus Nug enug qeum.

<sup>13</sup> Ag gonana amu Jesus Nug neeke, nakok uma uke, ad pig antom. Ad amu nug udug kudum amunu Jesus Nug meu aokunu gukuita uka, meunu haen iita amu Nug meunu neeka, Nug meu laa ii antom, udugib.

<sup>14</sup> Anam antom amunu Nug aum. “Na baula meut iinab omana!” awa aum. Awa a amu nuhikud ipunitak awak danab ag nai amu doopig.

<sup>15</sup> Doona amu ag gona, Jerusalem tena amu Jesus Nug Juda dilag mana metaknu lag oopa noa, Nug danab lag amu oopa mana metaknu keeke dadennu maadpig, laala daden mepig ele amu Nug ag oh lamatom. Apan danab laala ag men dodo baolipig ele amu nug ahilag balal huma awe, uka na qe, am laala ag upudil meeg, daden maadpig ele amu ahilag dayak aben ele huma awe, uka na qeum.

<sup>16</sup> Laa ele amu Jesus Nug, “Ag keeke aon laih gokulagnu amu ag Kayak laug oopa nona gokulagnu am elele iita,” awa aum.

17 Jesus Nug anam hewowa amu Nug ag amelagpa aum. “Kayak naipa yak inam daate. ‘Da laul am danab oh dilag unuqitak lag,’ amge ag heeg, nug yabhok danab dilag lokumak aben bia daate!’ awa aum.

18 Jesus Nug anam a amu mana metak danab okai amu do mehuqak danab ele ag danab ah laala kudum Jesusnu nainu oolag dayom anidpig amunu ag Jesusnu badan, qepeg mauhkunu ib madipig.

19 Jesus Nug anam he amu tueb meeme, Jerusalem oopa niiak aben oh am beum amunu Nug nuhikud ipunitak awak danab ele ag ahan, ab laapa niiglagnu gopig.

### *JESUS HE, AD PIG BUNADOM*

20 Ag niipig butua amu ag edun, Jerusalem gokulagnu ahan gona, ibpa ag ad pig, Jesus ad amunu meu baula ii omanu aum ele amu, nug epeg didi oh bunadom anidna,

21 Petrus nug dab mak awowa, Jesus amegpa aum. “Ipunitak danab, ante! Tumai na ad pig bunadkunu ame amu aaku bunadom!” awa aum.

22 Petrus nug anam a amu Jesus Nug aum. “Ag unuqitakpa keeke laa hepeg bekunu oolag dayeb amu ag Kayak Nug hekunu amu ag oolagpa genab doyeg!

23 Da genab ag amelagpa atem! Danab laa nug Kayaknu oopa genab doyak ele, nuhig dab mak adit iita amu nug qauko imu amegpa, ‘Na ahan yupa uke!’ ab amu nug anam heku.

24 Amunu ag keeke laa bekunu unuqidnana, ag aoglagnu oolagpa genab doonna amu ag unuqidpig amubia ag aoglag.

25 Laa ele amu na unuqidnana, na Mamen, hab atan daate, Nug nahip hipunin uhuqa medakunu amu danab laa nug nahipnu ehed heum dayeb amu na hipunin amu uhuqna mete!

26 [Amge na danab laanu hipunin uhuqna ii medape amu na Mamen, Nug hab atan daate amu, Nug ele nahip hipunin uhuqa ii metama.”]

### *JUDA DILAG OKAI AG JESUS NUHIG UDATNU OD MEDAPIG*

27 Ag nai amu matinna gona, Jerusalem tena amu Jesus Nug mana metak lag oopa noa oiyeye, mana metak danab okai amu do mehuqak danab amu Israel dilag gumak danab ele ag Jesus gumidna gona,

28 Nug od medapig. “Na gagatag adipa udat imu hetem? Aun gagatag amu mete, na udat imu hetem?” aon apig.

29 Ag anam aeg amu Jesus Nug aum. “Da ele ag keeke laipunu od madapi, ag nob mepeg amu da gagatag adipa udat imu hetem, diig amu api dooglag.

30 Od mak dahil am inam. Johanesnu layatak am adepanu beum, keeke amuam hab atanu keeke o iita amuam danabnu keekeib? Ag amu apeg dookul,” awa aum.

31 Jesus anam a amu ag aka aka matin apig. “Ig, ‘Habnu keeke,’ aput amu Nug, ‘Anam amunu ag adinu oolagpa genab ii doopig?’ aku.

<sup>32</sup> Amge ig, ‘Danabnu keeke,’ aput amu danab ah oh ag Johannesnu, nug am propet oolagpa genab dooteb amunu ag iqapeg mauhkunig,” aon apig.

<sup>33</sup> Ag aka aka anam anana amu ag Jesus amegpa apig. “Ig ii dootem,” aon apig. Aon aeg amu Jesus Nug aum. “Aaku amunu da ele gagatag adipa udat hetem amu da api ii doomna,” awa aum.

## 12

### *DAD GUMAK DANABNU NAI*

<sup>1</sup> Jesus Nug anam awowa amu Nug dig ma, keeke danab ag dooteb ii dooteb ele ou aqata, ipuanata, inam aum. “Danab laa nug grep dad epowa, ad ita, dad oopa grep lepu awaknu aben laa ha, nug dad gumak danabnu lag elab laa ele heum. Aria nug udat amu oh ha mala, udat hak danab epelagpa mewowa, nug aha, atu laih umanab ukom.

<sup>2</sup> Uka dayeye amu grep meu awak haen be, nug begbeg danab nuhig me, grep meu laih nuhig aokunu udat hak danab gumaata ukom.

<sup>3</sup> Uke amu dad udat hak danab ag adanna, makudna meeg, edua hamu ukom.

<sup>4</sup> Edua uke amu dad mameg nug begbeg laa me uke, dad udat hak danab ag danab amu iki ona, kobol ehed laala ele nuhigpa hepig.

<sup>5</sup> Anam heeg amu nug begbeg laa ele me uke, dad udat hak danab ag nug qeeg mauhom. Mauhe amu dad mameg nug laala ele maate ukaeg, dad udat hak danab ag laala makudadna, laala ag aqaeg mauhpig.

<sup>6</sup> Dad mameg nug anam ha mala amu nug beka, nug beka laa iita, laipuib, nug nuhignu oo huan

mauhtom ele amu nug me ugeke, inam aum. ‘Da bekal amu ag nug ode dooglag,’ awa aum.

<sup>7</sup> Nug anam a, nug beka uke amu dad udat hak danab ag anidna, ag aka aka apig. ‘Nid imu nug dimpa mamegnu keeke oh aoku amunu ahapeg, ig qeput mauheb, dad imu amu ihinig daaku,’ aon apig.

<sup>8</sup> Ag anam anana amu ag ahan gona, nid amu qeeg mauhe, ag nug gada budieg, dad dimitim ukom.” Jesus Nug anam matiom.

<sup>9</sup> Jesus Nug anam anana amu Nug nai tudita od matom. “Ag anam hepig amunu dad mameg nug ahilagnu adi heku? Da ag amelagpa atem. Dad mameg nug aha uka, nuhig dad udat hak danab amu oh aqeb mauhpeg amu nug grep dad amu edua awa, danab laala epelagpa meku,” awa aum.

<sup>10</sup> Nug anam anana amu Jesus Nug tudita aum. “Ag nai laa Kayak naipa daate ele amu, ag iite eb qepig. Nai amuam inam. ‘Men laa amu lag hak danab ag men amu uupig amge lag mameg nug men amu awa me, lagnu men anuqak daate.

<sup>11</sup> Nadi Nug keeke amu he beum amunu ig amenigpa anidta otaitem,’ ” awa aum.

<sup>12</sup> Jesus Nug anam a amu Juda danab okai ag Jesus Nug keeke danab ag dooteb ii dooteb ele ou aqata, ipuanatak nai amu ag ehed hak ahilag anidkulagnu matiom doopig amunu ag Jesus adaglagnu ib madipig. Madipig amge ag danab ah laala kudum ele badadpig amunu ag Jesus uuidna gopig.

*TAKIS KAISA METAKNU NAI*

13 Ag gona amu ag do gumak danab-Parasia amu Herodesnu ehanitak danab oolagpanu laipu laipu ele maateg gona, ag Jesus takisnu od medapeg, Nug ehed ab, ag Nug adaglagnu gopig.

14 Ag gumidna gona amu ag apig. “Ipunitak danab, ig dootem, na am danab tutuku. Na danab okai onig ele o danab onig iita amu na amu ohnu dab ii metem. Iita, na nai genabib atem. Na nai genab amupaib danab ah Kayaknu kobol ipuanadtem amunu keeke imunu ape doognig. Na atem dootem? Ig takis Kaisa metagnig am ena o ena iita?

15 Ig metagnig o iita?” aon apig. Ag anam apig amge Jesus Nug ahilag dab mak ham bupuak doya, Nug aum. “Adinu ag da adailkulagnu heteb? Ag men dodo laa onig danarius aon dopeg, da ante!” awa aum

16 Awa a amu ag men dodo laa aon doeg, Jesus Nug ag od matom. “Men dodo amupa am aun onig dotog ele daate?” awa aum. Awa a amu ag, “Kaisanu,” aon apig.

17 Ag anam aeg amu Jesus Nug aum. “Aria ag Kaisanu keeke amu ag Kaisa metaglag amge Kayaknu keeke amu ag Kayak meteg!” awa aum. Awa a amu ag dab mak kudum aopig.

### *EDUA HIBAITAKNU NAI*

18 Aria do gumak danab-Sadusi ag Jesus topa udipig. Danab amu ag, “Danab mauhteb amu ag edun ii hipaidmana,” aon adapig amunu ag Jesus od metan apig.

19 “Ipunitak danab, Moses nug ihinignu nai laa inam yom. ‘Danab ah ele a ewau daaiya, a nid

ii aopid haenpa danab nug mauheb, ah nug bau dayeb eb amu danab amu amag nug ah amu aweb, a nid menuglah amge a nid menuglah amu, nid amuam danab amunu iita. Nid amuam nug awag beka daaku.’

<sup>20</sup> Aria haen laa e amakud eblaih adit daapig. Ag anam daanna, awalag tatamnu nug ah awa, nid iita mauhom.

<sup>21</sup> Mauhe amu nug dimugpanu nug ah amu awa, nug ele nid iita mauhom. Mauhe nug dimugpanu ele anamib.

<sup>22</sup> Aria laa oh ele anam ah amuib aona mauheg, dimpa ah amu nug ele mauhom.

<sup>23</sup> Aria eamakud amu oh ag ah amu aakuib aweg, nug ag waalag dayom amunu edua hibaitak haenpa amu ah amu nug eamakud eblaih adit amu ag oolagpa aunnab wau daaku?” aon apig.

<sup>24</sup> Ag anam aeg amu Jesus Nug aum. “Ag Kayaknu nai ii doonna, Kayaknu gagatag amu ele ag ii dooteb amunu ag nai augigiak, diig iita maditeb.

<sup>25</sup> Edua hibaitak haenpa amu danab ag ah ii diimna, ah ele ag danab ii diimna. Iita, ag engel hab atannu bia daaglag.

<sup>26</sup> Amge danab mauhna, edun hipaidteb keeke amunu amu ag Moses nug Kayak naipa nai laa yom amu ag iite eb qepig? Haen amu ab ewewe, ad ewa iita ii meeme, Moses nug andete, Kayak Nug Moses amegpa a amu nug Kayak ode inam yom. ‘Da amu Abrahamnu Kayak, Isaknu Kayak amu Jakopnu Kayak ele,’ awa aum.

<sup>27</sup> Kayak Nug anam aum amunu ig dootem, danab ewam amu ag gemu daateb. Ag mauhpig

amge ag iita ii mepig amunu Kayak Nug danab daateb dilag Kayak daate. Nug anam daate amunu Nug ele heeb, ag edun hipaidkulag. Ag do gumak danab-Sadusi, ag edua hibaitak amunu ag ootot okai aqe heteb,” awa aum.

*DO ATEN ANUQAK DAA TE*

<sup>28</sup> Jesus Nug anam a amu do gumak danab laa nug ag nai amu matin heegeg doya, Jesus Nug nob ena meum ele doya amu nug Jesus inam od metom. “Ihinig do aten amu nug anuqak daate?” awa aum.

<sup>29</sup> Nug anam a amu Jesus Nug odepawa awa aum. “Do anuqak am inam. ‘O Israel, ag doyeg! Kayak, Nug ihinig Nadi amu, Nug nukaka Kayak daate.

<sup>30</sup> Nadi, Nug am nahip Kayak amu, na ootpa, na oudinpa, nahip dab makpa amu nahip keeke ohpa ele nuhignu oot mauhad!’

<sup>31</sup> Aria do amu dimugpa amu inam. ‘Na nakana nahipnu oot mauhte, amubia na danab laa dilag ele oot mauhad!’ Do laipu laa amu adit imu ii edate,” awa aum.

<sup>32</sup> Jesus Nug anam a amu do mehuqak danab nug aum. “Ipunitak danab. Na ena ame! Na ame am genab. Kayak Nug nukaka Kayak daate, laa iita

<sup>33</sup> amu ig genab ig oonigpa, ihinig dab makpa, ihinig keeke ohpa nuhignu oonig mauhku amu ig ika ihinignu oonig mauhte amubia ig laa dilag oonig mauhku, keeke adit amu a mana metak oh edidtep,” awa aum.

<sup>34</sup> Danab nug anam a amu Jesus Nug nob nuhig am ena anta, nug amegpa aum. “Na Kayaknu do madod oop gokutnu amu na ib amu odepadaatem!” awa aum. Awa a amu danab laala ag dab mak

ehedpa ele ag Jesus keeke laanu od metaglagnu badana, ii hepig.

### *JESUS AM AUN BEKA*

<sup>35</sup> Aria Jesus Nug mana metak lag oopa dayaya, danab ah ipuanatata amu Nug ag od matom “Do mehuqak danab ag, ‘Kayak Nug laa tituanom, amuam Kristus, Nug am Dawit beka,’ aon ateb amge atem doona, ag anam ateb?”

<sup>36</sup> Adinu? Kayak Oudi Nug he, Dawit nug inam aum. ‘Nadi Jehowa Nug dahil Nadi amegpa inam aum. “Na da epel nadiappa daappe ukeb, da nahip keked na waatpa maadkul.”’

<sup>37</sup> Ag iikud anteg! Danab nug, nug bekanu, ‘Nadi,’ ii ate amge Dawit nug nuka, nug bekanu, ‘Nadi,’ aum amunu ig atemun Kristusnu, ‘Nug am Dawit bekaib,’ akunig?” awa aum. Awa a amu abpan danab ag nuhig nainu oolag gamag ahom.

<sup>38</sup> Jesus Nug anam anana amu Nug nai baula tudita, danab ah amelagpa aum. “Do mehuqak danab ag lamen enanag elab ele takana, danab ah noolagpa oiglagnu oolag anuqak dayeye, ag danab laala ag humadkulagnu oolag okai ele daate.

<sup>39</sup> Ag nai doyak laka amu hobul haenpa ele amu ag aben anuqakpa daaglagnu itag aqate amge ag ahilag kobol amu hemananu dab meig!

<sup>40</sup> Do mehuqak danab ag anam henana amu ag ah qab ham bupualadna, laulkad yab awona, ahilag hipunin amu danab ah amelagpa lokumkulagnu ag unuqitak elab heteb amunu epediak haenpa geha ag ug okainab aoglag,” awa aum.

### *AHQAB NUG MENDODO KAYAK METOM*

<sup>41</sup> Jesus nai amu ma<sup>t</sup>iom dimpa amu Nug men do<sup>d</sup>o mak aben guguitak dayaya, Nug danab laala men do<sup>d</sup>o kunuppa meegeg ana<sup>t</sup>om. Laala, ag enulag ku<sup>d</sup>um ele amu ag ku<sup>d</sup>um mepig.

<sup>42</sup> Meegeg amu ah qab da<sup>d</sup>ek ele nug apa u<sup>k</sup>a, men do<sup>d</sup>o a<sup>d</sup>it, wan toea bia, kunuppa meum.

<sup>43</sup> Me amu Jesus Nug nuhikud ipunitak awak danab onilagpa e doeg, Nug ag amelagpa aum. “Da genab ag amelagpa a<sup>t</sup>em. Ah qab da<sup>d</sup>ek ele imu nuhig men do<sup>d</sup>o kunuppa meum amu danab laala mepig ele amu oh e<sup>d</sup>adte.

<sup>44</sup> Adinu? Laa oh ag men do<sup>d</sup>o ku<sup>d</sup>um ele amu, ag laih nakok amupan aon mepig amge ah imu nug men do<sup>d</sup>o nakoknab nuhig, nug ehanid<sup>k</sup>unu dayom, amu oh meum,” awa aum.

## 13

### *HAEN MALAKUNU EPONAK KEEKE DIIGDIIG*

<sup>1</sup> Jesus Nug anam a amu Nug nuhikud ipunitak awak danab ele ag ahan, mana metak lag dimitim gonana, nuhig ipunitak awak danab laa nug Jesus amegpa aum. “Ipunitak danab, ante! Ag men enapaib lag imu oh ena hepig!” awa aum.

<sup>2</sup> Nug anam a amu Jesus Nug aum. “Ag lag okai imu anadteb amge dimpa ag men imu lopadpeg, nena qena, laa nug laa qadepa iinab daama. Ohnab lopadpeg, honap nena qekulag,” awa aum.

<sup>3</sup> Aria Jesus Nug aaku mana metak lakanu aha noa, Olip qaukopa ta dayeye amu Petrus, Jakobus, Johanes amu Andreus ele ag aka gumidna gona,

<sup>4</sup> Nug od medapig. “Na amenigpa ame amu kobol amu haen genab beku? Amu ele eponak

keeke adi tatam beeb, keeke amu oh bekunu miag daate amu ig doognig?" aon apig.

<sup>5</sup> Ag anam aeg amu Jesus Nug aum. "Danab laa ag bupualadmanu ag dab meig!

<sup>6</sup> Adinu? Danab kudum ag da onilpa u<sub>di</sub>n, 'Da am Kristus' anana, kudum laa bupualadk<sub>u</sub>lag.

<sup>7</sup> Amu ag bannu doonna, bannu ulah nai ele dooglag. Keeke amu genab bek<sub>u</sub>lag amge doyeg, ag aib o<sub>ta</sub>ipig. Wan haen malak i<sub>ta</sub>.

<sup>8</sup> Danab be<sub>du</sub>lag laa ag danab be<sub>du</sub>lag laa ele nug qe<sub>ku</sub>lag amu wan laa ag wan laa ele nug qe<sub>ku</sub>lag. Aben laalapa amu mim nebepeg, enug haen o<sub>ka</sub>i ele ne<sub>ku</sub>lag. Kobol amu oh am nid do<sub>ku</sub>nu ah ag gui<sub>ta</sub>k tatam doo<sub>te</sub>b amubia aak<sub>u</sub>ib.

<sup>9</sup> Amu ag ahilag oiyaknu dab meig! Ag laala amu ag a<sub>du</sub>aladna, he<sub>to</sub>diakpa maad<sub>ku</sub>lag. Ag laala amu ag nai doyak la<sub>ka</sub> apa ma<sub>ku</sub>dad<sub>ku</sub>lag. Da onil ahilagpa daate amunu ag diiadna, king gabman ele epelagpa maadpeg, ag he<sub>to</sub>diad<sub>ku</sub>lag. Amu ag haen amupa dahilnu nai ena amelagpa mehu<sub>q</sub>ku<sub>la</sub>g.

<sup>10</sup> Dahilnu Nai Ena amu wan ohpanu danab ag doon malapeg amu malaknu haen miag daa<sub>ku</sub>.

<sup>11</sup> Amu ag dahilnu Nai Ena mehu<sub>q</sub>ku<sub>la</sub>g amunu ag a<sub>du</sub>aladna, he<sub>to</sub>diakpa maadpeg ag haen amupa adi a<sub>ku</sub>lag, nai amunu dab huan aib mepig. I<sub>ta</sub>, haen amupaib Kayak Oudi Nug nai adi ipuanateb, ag nai amuib a<sub>ku</sub>lag. Ag a<sub>ka</sub> i<sub>ta</sub>. Kayak Oudi Nug nuhig u<sub>da</sub>t ahilagpa he<sub>ku</sub>.

<sup>12</sup> Haen amupa danab laa nug awag o nug amag mauhk<sub>u</sub>nu keked epelagpa me<sub>ku</sub>. O danab laa nug be<sub>ka</sub> ele anam he<sub>ku</sub>. Nid naunau ag ele e<sub>du</sub>n anilk<sub>ad</sub> mamel<sub>ka</sub>d mauhk<sub>u</sub>lagnu gedadna, keked

epelagpa maadk<sub>u</sub>lag.

<sup>13</sup> Da onil ahilagpa daate amunu danab oh ag oolagpa ahilagnu nau, ninig ele dooglag amge laa nug gagatag dayeb<sub>e</sub>b uke<sub>b</sub>, keeke oh ba maleb, haen amupa ele nug gagatag daaku amu, nug padal ii mema.

<sup>14</sup> Aria propet Daniel nug keeke naunab laa, nug ab he nauhte ele, amunu yom. Danab aun nug nai imu eb qete amu nug meu nuhig tutuku aokunu dab mad! Amu ag keeke naunab amu nug aben daakunu elele iitapa dayeb anidna, ag Juda danab ah ag ahan oolna qaukopa ukeg!

<sup>15</sup> Genab, haen amupa danab laa nug ulah awak abenpa, lag atan daate amu agupa dayaya, nug oolkunuib dab maama, nug lag oopa noa, keeke ii aoma. Iita. Oola ukad!

<sup>16</sup> O laa nug data dayaya, nug oolkunuib dab maama, nug edua lam<sub>e</sub>n nuhig aokunu laka ii goma.

<sup>17</sup> Haen amupa ah oolag ele, ah ag nid yud huh madateb ele amu, ahilagnu amu gadonnab.

<sup>18</sup> Ag keeke amu oug haenpa bemanu unuqiteg!

<sup>19</sup> Adinu? Haen amupa amu ug nadinab daaku. Ug amubia ded laa Kayak dig ma keeke oh heum udiak gemu ele, dimpa ele amubia ii daama.

<sup>20</sup> Anam daate amunu Kayak Nug haen amu tutuib daakunu, haen amu ii okullo, danab ah oh padal melob amge Kayak Nug danab ah nuhikud tituanatom ele, Nug amu dilag dab ma, haen tutu okulku.

<sup>21</sup> Aria haen amupa danab laa nug ag amelagpa, 'Anteg! Kristus Nug ipa ina daate,' o iita, 'Anteg! Kristus upa uma daate,' ab amu ag oolagpa genab

aib doopig.

<sup>22</sup> Adinu? Geha ham bupuak danab laa ag ham bupuna, 'Da am Kristus,' o 'Da am propet,' akulag. Ag amu henana, ag ahan, danab Kayak Nug tituanatom ele amu ag amelagpa eponak keeke, danab hekunu elele iita henana, ag ham bupualadkulagnu wagai mekulag amge elele iita.

<sup>23</sup> Amunu ag dab meig! Da keeke amu ii neumpa, keeke amu ohnu ag amelagpa ain malami," awa aum.

<sup>24</sup> Jesus Nug anam anana amu Nug nai baula aum. "Aria ug amu oh maleb amu aam nug ii amahalma, kalam ele ii amahalma,

<sup>25</sup> habpanu hodopai laala ag nena qebepeg, laa ag udalnana, ag ipulag tutuku ii dim lamidmana.

<sup>26</sup> Keeke amu oh ba maleb, Danab Bekalag da, da lombigpa gagatag okai amu amahlak okai ele udipi anidkulag.

<sup>27</sup> Da udien amu da dahilad engel hepi, ag gona, danab ah da tituanadmi amu, aben ohpanu qag maadna, diin udiglag.

<sup>28</sup> Nai amunu amu ag ad pignu kobol dab menana, dab mak aoglag. Ag ad pig nug udug bau bekunu dig ma haulte anidna amu ag haen amupa, 'Aam haen nug aaku dig mete,' aon ateb.

<sup>29</sup> Ag ad pig nug bau bekunu dig ma haulte anidna ag, 'Aam haen miag dote,' dooteb amubia ag kobol diigdiig oh da ami ele amu bebepeg anidna, ag dahilnu, 'Nug edua udikunu haen aaku miag daate,' dooglag.

<sup>30</sup> Da genab ag amelagpa atem. Danab ah haen imunu oh ii mauhadpeg, geha keeke amu oh beku.

31 Hab wan ele amu iita mekulah amge dahil nai amu iita iinab mema,” awa aum.

*JESUS EDUA UDİKUNU HAEN AMU, DANAB LAA II DOOTE*

32 Anam amge laipu laa nug ded amunu haen ii doote. Engel hab atannu ele ii dooteb. Da ele ii dootem, Mama Nug nuka keeke amu doote.

33 Ag haen amu ii dooteb amunu ag dab menan dayeg!

34 Haen amu inam bia beku. Danab laa nug atu laih gokunu aha, nug laugpanu udat oh otia, nuhikud udat danab epelagpa mewowa, laa nug nuhig okai edua udikunu dab maama daakunu anana, aha ukom.

35 Amunu ag danab, nug nuhig okai edua udikunu dab maama daakunu aum, amubia amu ag dab menana dayeg! Adinu? Ag Nug edua udikunu haen ii dooteb, tuebtai o tugmagtai o butua wagdebtai.

36 Nug pahatai edua udiku amunu ag niimnanu dab meig!

37 Nai imu amu ahilagib iita. Da danab ah oh dilagnu ele atem. “Ag dab medanna dayeg!” awa aum.

## 14

*BETANI ABPA AH LAA GODEN AWA UKA JESUS LAAITOM*

1 Jesus Nug nai amu oh matia male amu dimpa Pasowa metid hobul ded ii nak, nekunu ded adit dayeye, hobul amupa ag bret hamuib ladapig ele amu, mana metak danab okai, do mehuqak danab

ele amu ag lokumakpa Jesus adan, qepeg mauhkunu ib madipig.

<sup>2</sup> Amu ag keeke amu hekulagnu inam apig. “Danab ah nug qemana, mutub ele qemananu amu ig Pasowa hobul haenpa Jesus ii adamta,” aon apig.

<sup>3</sup> Aria Jesus Nug Betani apa danab onig Simon, nug gada ode ele amu, nug laugpa e lanan dayeye, ah laa nug men id enanag, goden mutudig enanag, nob okainab ele inak, amu awa, gumita udiom. Ag goden amu bala laa onig nad, amupa hedapig. Aria ah amu nug amu awa udia, id baag amu qe aode, Jesus igipa gokadom.

<sup>4</sup> Nug anam he amu danab laala, apa daapig ele amu, ag oolag nauhe, aka aka kobol amunu matin apig. “Adinu nug goden amu hamu kakitom?”

<sup>5</sup> Nug goden amu meeb, danab laa nug mad laipunu udat nob editak daden meeb, men dodo amu dadek danab matalo am ena,” aon apig. Ag anam anana amu ag ah amu aidpig.

<sup>6</sup> Ag anam aiteg amu Jesus Nug ag amelagpa aum. “Ag uueg! Adinu ag ah imu oo ug medateb? Nug dahilnu kobol enanag heum.

<sup>7</sup> Dadek danab amu, ag ag oolagpa hanhan daaglag amunu ag ehanadkulagnu oolag dayeb amu ag ehanadkulag. Amge da ag ele haen oh ii daamta.

<sup>8</sup> Ah imu nug dahilnu kobol ena hekunu elele anta, nug heum. Nug da bedul modpa nokunu gadal babaita, goden amu gokadom.

<sup>9</sup> Da genab ag amelagpa atem. Dimpa danab ag dahilnu Nai Ena wan adepa adepa mehuqnana, ag

ah imu keeke heum, nug ag daulagpa dokunu, ag amunu ele matiglag,” awa aum.

<sup>10</sup> Aria haen amupa ipunitak awak danab tuelp, ag oolagpan laipu, nug onig Judas Iskariot, nug mana metak danab okai gumata uka, Jesus ag epelagpa mekunu aum.

<sup>11</sup> Nug anam a amu ag oolag gamag ahe, nug anam heeb, ag men dodo metaglagnu nai qakan apig. Ag anam aeg amunu Judas nug haen ena adeku Jesus ag epelagpa mekunu ib matiom.

### *JESUS PASOWA HEUM*

<sup>12</sup> Aria Pasowa metid hobulnu babaitaknu ded ne, ded amu Juda danab ag Pasowa hobulnu dod sipsip aqaeg mauhadtapig ele, ded amupa Jesusnu ipunitak awak danab ag Jesus od medapig. “Ig na Pasowa e lakutnu amu ig amunu adepa bapaidkunignu oot daate,” aon apig.

<sup>13</sup> Ag anam aeg amu Jesus Nug ipunitak awak danab adit amelahpa aum. “A ahaya goya, abpa noya, apa amu a danab nug nipud, le am bak ele, amu mawa doa, a udalah teeb amu a nug dim lamidya uked!

<sup>14</sup> Dim lamidya goped, nug lag atenpa teeb amu a lag amu nug mameg amegpa inam aid! ‘Ipunitak danab ihinih Nug inam aum. “Da dahil ipunitak awak danab ele ig na lautpa oo atenpa Pasowa lakunig?’ ’ aoya akulah.

<sup>15</sup> A anam aped, geha nug lag oo okai, balal dayak aben ele amu ana ipuanateb, a lag oo amupa Pasowa babaited!” awa aum.

16 Jesus Nug anam a amu a ahaya goya, abpa noya amu Jesus Nug aum amubiaib anidpid. Anidya amu a Pasowanu e bapaidpid.

17 Bapaidya malapid amu tueb meeme, Jesus Nug nuhikud ipunitak awak danab tuelp amu ag oh apa gopig.

18 Aria ag gona tena, balalpa e lanana, Jesus Nug aum. “Da genab ag amelagpa atem. Ag oolagpanu danab laa, nug da ele geha iiku e latep amu nug da keked epelagpa meidku,” awa aum.

19 Nug anam a amu ipunitak awak danab ag oolagpa ugnab doonna, ag anen anen Jesus od medapig, “Na ame am date?”

20 Ag anam od metaeg amu Jesus Nug nai ikuib nob meum. “Ag danab tuelp amu ag oolagpanu laa nug da ele geha iiku e latep amu nug ana heku.

21 Danab Bekalag da, Kayak nai ate amubianab, da mauhkul amge danab nug da keked epelagpa meidku amu nuhignu gadonnab, nug anig amu nug ii menulo am ena,” awa aum.

22 Jesus Nug anam a, ag oh e lanan daanna amu Jesus Nug bret awa, Kayak unuqita, pane ne, pania madata, inam aum. “Ag aon laig! Imu da bedul.”

23 Nug anam anana amu Nug wain hai gokodpa awa, unuqita mate, ag oh lapig.

24 Ag laegeg amu Jesus Nug ag amelagpa aum. “Imu da tiil, amupa da tituanak bau hetem. Da danab ah kudum dilag hipunin uhuqen madakulnu gokadtem.

25 Da genab ag amelagpa atem. Da grep lepu wain geha iiku latep imubia baula paha ii lapa. Iita. Dimpa da Kayaknu do madod oopa dayeye am

da wain bau lakul,” awa aum.

<sup>26</sup> Nug anam a amu ag ahi laa etona, ag ahan, dimitim wana, Olipnu qaukopa gopig.

*JESUS NUG PETRUS, “DA NUG II DOOTEM,”  
HAEN EWAM AKUNU AUM*

<sup>27</sup> Ag gona tena, Jesus Nug aum. “Kayak naipa yak laa niite am inam. ‘Da gumak danab qepi mauheb, sipsip ag oh oolna matatun gokulag!’ amunu yak amubia amu gemu tuqan imu ag oh uuidna oolna gokulag.

<sup>28</sup> Amge dimpa da eduen hibaiten, da anuqen, Galelia wanpa gopi, ag da dim lamidna gokulag,” awa aum.

<sup>29</sup> Nug anam a amu Petrus nug Jesus amegpa aum. “Danab laa oh ag nahipnu ehed doon, uuidna oolna gokulagtai amge da am anam ii hepa!” awa aum.

<sup>30</sup> Petrus nug anam a amu Jesus Nug odepa awa aum. “Da genab na amenpa atem. Gemu tuqan imupa na dahilnu, ‘Da Nug ii dootem,’ aon, haen ewam batak akut. Na haen ewam anam ape, dimpa matuk dawai nug gaaku,” awa aum.

<sup>31</sup> Awa a amu Petrus nug gagatag aum. “Iita! Da na ele mauhkunihnu dayeb amu da amunu ug ii dootem amge da nahipnu, ‘Da ii dootem,’ ii apa! Iitanab iita,” awa aum. Awa a amu ipunitak awak danab laa oh ag anamib apig.

*JESUS GETSEMANI UNUQITOM*

<sup>32</sup> Ag gona, aben laa onig Getsemani tena, Jesus Nug ipunitak awak danab amelagpa aum. “Ag igupa daapeg, da uken unuqidkul,” awa aum.

33 Nug anam anana amu Nug Petrus, Jakobus, Johanes ele aakuib diiate, Nug ele gopig. Gona amu Nug oopa ugnab doyom.

34 Nug anam doya, Nug ag amelagpa aum. “Da oolpa kahipan tode mauhak bia dootem amunu ag igupa daanna, dab menan dayeg!” awa aum.

35 Nug anam anana amu Nug nakok laa ele wana uka, apa Nug dup noa, gateg qaun wa, haen nau amu ii anidkunu inam unuqitom.

36 “O Mame, ug oh da maokul ele, amuam lepu mua ehed hai gokodpa daate bia, amu na ib laa anidna na ape, da le hai gokod amupanu amu da ii lapa amge na da ool daate aib dim lamidme. Na oot daate amuib dim lamite!” awa aum.

37 Nug anam anana amu Nug edua, ipunitak awak danab ewam niiegeg anata, Nug Petrus amegpa aum. “Simon, na niitemte? Na aam ameg laipuib dab menan daakutnu elele iiate?”

38 Satan ag eedateb, ehedpa gomananu ag dab menan daanna, unuqiteg! Ag oudilag am elele amge ag bedulag am elele iita,” awa aum.

39 Nug anam anana amu nug edua uka tatam unuqitom anamib baula unuqitom.

40 Unuqitowa amu Nug edua uka, ipunitak awak danab ag amelag ehed neum amunu ag niiegeg anate, ag Nug amegpa nai laa akulagnu ii doopig.

41 Aria haen ewampa nug edua uka, ag niiegeg anata amu Nug ag amelagpa aum. “Ag iite ahapig? Ag geha iiku elete niin aotna aotebte? Aaku elele! Danab nug Danab Bekalag da, hipunin danab epelagpa meidkunu haen aaku doum.

42 Ahapeg gotu! Anteg, danab nug da keked epelagpa meidku ele amu nug aaku udite,” awa aum.

43 Jesus Nug nai amu matieye amu ipunitak awak danab tuelp oolagpan laa onig Judas, amu danab kudum ele, danab amu ag qep elab amu dadib maha ele adapig amu, ag mana metak danab okai amu do mehuqak danab amu Juda iki danab ele ag apig bia, Judas ele udipig.

44 Tatam Judas nug ag Jesus adaglagnu eponak keeke laa hekunu amelagpa inam aum. “Da danab laa ootucidkul ele amu, ag Nug adan, aon ukeg!” awa aum.

45 Anam amunu Judas adi ag gona, Getsemani tena, Judas nug paha Jesus gumita uka, “Ipunitak danab,” awowa, nug ootuidom.

46 Ootuidite amu ag Jesus adapig.

47 Adaegeg amu laa apa dayom ele amu nug qep elab nuhig eeda awa, mana metak iki danab, nuhig begbeg laa daug hoiyom.

48 Anam he amu Jesus Nug amelagpa aum. “Da yabhok danabte daatem amunu ag qep elab amu dadib ele aon adailkulagnu udipig?”

49 Da ded oh mana metak laka danab ah ipunitak maadtami amge ag ii adailpig. Amge Kayak nai ate amuib bad!” awa aum.

50 Nug anam a amu nuhikud ipunitak awak danab ag oh uuidna, oolna gopig.

51 Amu nid bau laipu laa nug Jesus Getsemani ugeke, haen amu nug ele Jesus dim lamitom. Nug lamen linen taka ukom. Uka dayeye amu ag Jesus adana, ag nug ele daeag,

52 nug lamen uua, hamu oola ukom.

*JESUS NUG JUDA DILAG EPEDIAK OKAI, ONIG SANHIDREN, AG NOOLAGPA DAYOM*

<sup>53</sup> Ag Jesus adana amu ag Nug aon gona, mana metak iki danab topa gopig. Amu mana metak danab okai, abnu iki danab amu do mehuqak danab ele ag oh apa qag mepig.

<sup>54</sup> Ag Jesus adan omalna teegeg amu Petrus nug dim lamatom amge nakok pide dim lamatom. Dim lamata, lagnu ad oopanab ta, lag mamegnu daup oolagpa ab udika dayom.

<sup>55</sup> Petrus nug apa dayeye amu lag oopa mana metak danab okai amu Juda dilag hetodiak okai, onig Sanhidren, amunu danab ele, ag oh Jesus qepeg mauhkunu danab laa nug Jesus adi ehed heum amunu akunu madipig. Madipig amge ag laa ii anidpig.

<sup>56</sup> Matiegeg amu danab laala ag ahan, ham bupuna, Jesus Nug adi ehed heum apig amge ahilag nai am idu laipu iita, pide pide.

<sup>57</sup> Anam heegeg amu laala ag ham bupuna, Jesus gedidna, inam apig.

<sup>58</sup> “Danab imu Nug inam a doomut. ‘Da mana metak lag imu, danab epelagpa hepig ele amu, da hepi nauheb, ded ewampaib amu da bau hekul amge da epelpa ii hepa.’ Nug anam aum,” aon apig.

<sup>59</sup> Ag anam apig amge ahilag nai amu ele idu laipu iita, pide pide.

<sup>60</sup> Ag anam ham bupun matieg amu mana metak iki nug ag noolagpa hibaita, Jesus od metom. “Nai amunu amu na nob iite memana? Nai anak amuam genab o genab iitate?” awa aum.

61 Nug anam aum amge Jesus Nug nai nakok laa ii matiom. Aria mana metak iki nug edua, bau od metom. “Na am Kristus, Kayak bekate?” awa aum.

62 Nug anam od mete amu Jesus Nug aum. “Yo, da iiku amu dimpa ag Danab Bekalag da, Kayak gagatag oh ele amu, Nug epeg nadiappa, amuam anuqak aben, amupa daappi anidna amu hab waapanu lombigpa ele udippi anidkulag,” awa aum.

63 Jesus Nug anam a amu mana metak danab dilag iki nug nuhig lamen ada, patida, nug aum. “Ig danab laala danab imu ehed heumnu matiglagnu ii matimta. Iiku elele!

64 Nug nuka nuhignu, ‘Da am Kayak,’ aum amunu Nug Kayak dabiata awa awa qetom. Ag nai amu doopig amu ag nuhignu adi ateb?” awa aum. Nug anam a amu ag oh, “Nug ehed heum, Nug mauhku,” apig.

65 Ag anam anana amu laa ag hunu qeegeg, laa ag lamempa ameg qakana, epelagpa makudnana apig. “Kayak ehaniteb, na aun na oitom ape dootu!” aon apig. Aria mana metak iki, nuhikud daup, ag ele nug makudpig.

### *PETRUS JESUSNU, “DA NUG II DOOTEM,” AUM*

66 Amu Petrus nug lagnu ad oopa dayeye, mana metak iki, nuhig begbeg nid ahin laa nug doa,

67 Petrus nug ab udika dayeye anta, nug aum. “Na ele am Nasaret ted Jesus, Nug ele oipid!” awa aum.

68 Nug anam a amu Petrus nug aum. “Iita! Da nai amuam da ii dootem!” awa aum. Anam anana amu nug aha, lagnu ad odpa uka dayom.

<sup>69</sup> Daye, dimpa begbeg ah amu nug Petrus baula anta amu nug laala daapig ele amu, ag amelagpa aum. “Danab imu nug Jesus adi lailag!” awa aum.

<sup>70</sup> Nug anam a amu Petrus nug baula, “Iitanab,” awa aum. Nug a amu nakok dimpa danab apa daapig ele amu, ag Petrus amegpa apig. “Na am Galelia ted amunu genab na am Jesus layag!” aon apig.

<sup>71</sup> Ag anam aeg amu Petrus nug nai gagatagnab inam aum. “Da nai genab ii api amu Kayak Nug da nob nau medad! Da genab iiku atem! Danab amu ag nuhignu ateb ele amu, da Nug iinab dootem!” awa aum.

<sup>72</sup> Petrus nug anam a amu matuk dawai nug paha baula gayom. Gayeye amu Jesusnu nai, “Tuqan imupa na dahilnu, ‘Da Nug ii dootem,’ ape, haen ewam batak akut. Na haen ewam anam ape, dimpa matuk dawai nug gaaku,” nai amu Petrus daugpa doum. Nai amu Petrus daugpa do, dab maama gayom.

## 15

### *JESUS PILATUS NOOBPA DAYOM*

<sup>1</sup> Aria wagde butua amu mana metak iki danab, Juda iki danab, do mehuqak danab amu Juda dilag hetodiak okai, onig Sanhidren, amunu danab ele ag oh qag mena, Jesus mauhkunu nai qakona, Jesus epeg mudipa qakana, aon gona, Pilatus epegpa mepig.

<sup>2</sup> Jesus Nug anam dayeye amu Pilatus nug od metom. “Na Juda dilag kingte?” awa aum. Awa a amu Jesus Nug aum. “Na aaku atem,” awa aum.

<sup>3</sup> Jesus Nug anam a amu mana metak danab okai ag nuhignu nai hamu yaan henan, “Jesus ehed kudum heum,” Pilatus amegpa apig

<sup>4</sup> amunu Pilatus nug Jesus od metom. “Ag na ehed kudum hemenu ateb amu na nai amunu eduna, nob iitai amana?” awa aum.

<sup>5</sup> Pilatus anam aum amge Jesus Nug odepa ii awom amunu Pilatus nug dab mak kudum awom.

<sup>6</sup> Aria mad ohpa Pasowa hobulnu dedpa gabman nug danab ah ag hipunin danab aten uhuqa mada kunu apig amu nug mani guitakpanu od matule dotom.

<sup>7</sup> Amu danab laa ag gabman ele ban henana, ag danab aqaeg mauhpig amunu ag mani guitakpa daapig amu ag oolagpanu danab laa onig Barabas, nug ag ele oh haen amupa mani guitakpa daapig.

<sup>8</sup> Nug mani guitakpa dayeye, Jesus Nug Pilatus epegpa dayeye amu Juda danab kudum ag ahan, Pilatus topa gona, ag nug hanhan mani guitak danab laa uhuqtom bia hekunu apig.

<sup>9</sup> Ag anam aeg amu Pilatus nug aum. “Da Jesuste uhuqkulnu oolag daate?” awa aum.

<sup>10</sup> Pilatus nug Jesus nuhig hak ena, hak amupa Nug Juda okai edatom amunu ag oolag nauhe, Jesus hetodiakpa mepig doyom amunu nug anam od matom.

<sup>11</sup> Pilatus nug anam od matom amge mana metak danab okai ag ahan, wagai mena, danab oh gada mataeg, ag Barabas uhuqkununu apig.

<sup>12</sup> Ag Barabasnu apig amunu Pilatus nug aum. “Amge ag Juda dilag king imu, da nuhignu adi hekulnu oolag daate?” awa aum.

13 Nug anam a amu ag epig. “Ad emaitakpa atule!” aon epig.

14 Ag anam eeg amu Pilatus nug od maṭom. “Adinu? Nug adi ehed heum?” awa aum. Nug anam aum amge danab kudum ag baula huan epig. “Ad emaitakpa atule!” aon epig.

15 Ag anam eeg amu Pilatus nug danab kudum ag oolag ena daakunu Barabas uhuqom. Barabas uhuqa amu nug nuhikud daup ag Jesus wippa ehed matadkulagnu a, ag anam heeg, Pilatus nug Jesus ad emaitakpa atulkulagnu anana, nug Jesus awa, ag epelagpa meum.

### ***BAN DANAB AG JESUS AON AON QEDAPIG***

16 Pilatus anam maṭiom amunu nuhikud daup ag Jesus aon gona, gabman dilag okai laug oopa nona, ag daup laa oh onilagpa eeg, udieg,

17 ag oh lamen kokod enanag Jesus aduiteg no, ag king igipan bala bia muḍi qaun elepa hewona, Jesus igipa adaeg noum.

18 Adaeg no amu ag aon aon qetan, Jesus humidna apig. “Na am Juda dilag king! Na binan ele!” aon apig.

19 Ag anam henana amu ag gumu laa, qaitobṭob gumu bia, amu aona, Jesus iki onana, hunu qenana, Nug noobpa ham bupuak dup nona, gatelag qaun opig.

20 Ag aon aon qetan malana amu ag lamen kokod enanag uḍidna, nuhig lamen edun aduiteg no, ag ad emaitakpa atulkulagnu aon gopig.

### ***AG JESUS AD EMAITAKPA ATULPIG***

21 Ag ibpa gonana amu ag Sairini ted, Rupas, Aleksanda ele mamelah, onig Simon, nug ab

dimitimnu udia, ab okaipa nokunu doodo, ag nug anidna amu ag dutunna heeg, nug Jesusnu ad emaitak maokunu apig.

<sup>22</sup> Nug ad emaitak mawewe amu ag gona, Golgata apa tepig. Golgata diig am Ikilag Ebehi.

<sup>23</sup> Tena, apa amu ag Jesus wain marasin laa onig mir koboliak, Nug amu lakunu metæg am Nug ii laum.

<sup>24</sup> Jesus Nug anam he, ag Nug ad emaitakpa atulona amu ag nuhig lamen aoglagnu amu ag otina, ameg wadele mewona, aun nug ameg aten aoku amu ag keeke laa onig dais amupa qid hena, aopig.

<sup>25</sup> Ag butua aam ameg eblaih wadelepa ad emaitakpa atulpig.

<sup>26</sup> Rom danab ag danab ad emaitakpa atuladtapig ele amu, ag adi nai ag bedulagpa yaapig ele, danab ag amu anidkulagnu, ag udugpa yaana, ad emaitakpa atulpig. Aria Jesusnu amu ag, “Nug Juda dilag king,” anam ana yan, ad emaitakpa atulpig.

<sup>27</sup> Ag danab adit laa, a am yabhok danab amu, ag a Jesus ele oh atuladpig. Ag danab laa Jesus epeg nadiapa atulona, laa am epeg nanehpa atulpig.

<sup>28</sup> [Ag Jesus danab adit ele atuladpig amunu Kayak nai laa danab yom amu meu oom. Nai am inam. “Ag nuhignu, ‘Nug am hipunin danab lailag,’ akulag.”]

<sup>29</sup> Jesus Nug ad emaitakpa dayeye amu danab ah ag Nug noobpa dona wanana, ag ikilag matudna, aon aon qetanna, inam apig. “O! Na mana metak lag lopadna, edun ded ewampaib

heikutnu ame

<sup>30</sup> amunu na anam heikutnu elele amu na ad emaitakpanu bedun uhuqna nena, ena daye!” aon apig.

<sup>31</sup> Ag anam aegeg amu mana metak danab okai, do mehuqak danab ele ag aon aon qetan apig. “Nug danab laa ehanatom amge Nug nuka ehanidkunu elele iita.

<sup>32</sup> Nug am Kristus, Juda dilag kingde! Nug ad emaitakpanu neeb, ig anita, ig nuhignu oonigpa genab doognig,” aon apig. Ag anam aegeg amu danab adit ag a Jesus ele atuladpigi amu a ele Jesus amegpa awa awa qetak nai madipid.

### *JESUS MAUHOM*

<sup>33</sup> Anam heegeg uke, aam ameg tuelppa gatatu wan amu oh na tone uke, aam ameg ewampa batom.

<sup>34</sup> Aria aam ameg ewampa Jesus Nug bag okaipa ewa aum. “Eloi Eloi lama sabaktani,” awa aum. Nai amu eduak am, “O Mame O Mame! Adinu na da uuidme?”

<sup>35</sup> Jesus Nug anam e, danab apa Nug guguitak daapig ele ag amu doon apig. “Doyeg! Nug Elias onigpa ete,” aon apig.

<sup>36</sup> Ag anam anana amu ag oolagpanu danab laa nug aha, qaiqad uka, yupan keeke laa, nug le huanak eedte ele onig span amu awa, wainpa mewowa, nug awa, gumu laa, qaitobtob gumu bia, amupa ita, medakunu haaha, nug aum. “Daapeg, Elias nug na ehaniteb, nug ad emaitakpanu neku o iita amu ig anidkunig,” awa aum.

<sup>37</sup> Danab nug anam a amu Jesus Nug baag okaipa ewowa, Nug mauhom.

38 Jesus mauhom, haen amupa mana metak lag oopa lamen nadi aiheg dayom ele amu, gamagpanab atannu katida uka, honap noum.

39 Jesus mauhe amu daup ikilag nug Jesus atem mauhom anta, nug aum. "Genab, danab imu Nug am Kayak beka!" awa aum.

40 Amu Jesus Nug ad emaitakpa dayeye amu ah laala ag pide daanna anidpig. Ag oolagpanu laa amuam Maria, Magdala ted, laa amu Jakobus gehanu Josi ele anilah Maria, laa am Salome.

41 Ah ewam amu ag Jesus Nug Galelia oiyeye ehanitegeg, Nug Jerusalem teete amu ag ele tepig. Ah laala apa daapig amu ag ele Jesus dim lanidna, Jerusalem tepig.

### *JOSEP AMU NIKODEMUS ELE A JESUS BOOMPID*

42 Aria Jesus Nug mauhe amu tueb me, ded amuam Juda dilag Metidnu keeke babaitaknu ded, ded amu dimugpa amu ahilag Metid

43 amunu Arimatia ted Josep nug ii bada, Pilatus topa uka, Jesus gada aokunu od metom. Josep nug Juda dilag hetodiak okai onig Sanhidren, amunu nug laa aaku. Amu laa ag amunu danab daapig amu nug ag oolagpanu am onig ele. Laa ele nug Kayak do madod ameg meum.

44 Josep nug Pilatus od mete amu Pilatus nug Jesus paha mauhom amunu nug dab mak kudum awom. Awa amu nug daup ikilag onigpa e udie, "Jesus Nug matu mauhomte o iitate?" awa od metom.

45 Anam anana amu Pilatus nug daup ikilag odepa Jesus mauhomnu doya, nug Arimatia ted Josep nug Jesus gada aokunu elele aum.

46 Pilatus nug a amu Josep nug lamen linen daden ma, Jesus gada ad emaitakpanu awowa, gada lamen amupa ita, mod menpa bapaidpig ele, amupa mewowa, nug men laa budibdib mete uka, men modnu ode tonom.

47 Nug Jesus gada men modpa meeme amu Maria, Magdala ted, amu Josi anig Maria ele a aben amu anidpid.

## 16

### *JESUS EDUA HIBAITOM*

1 Jesus Nug modpa niieye amu Juda dilag Metid male, Maria, Magdala ted amu Jakobus anig Maria amu Salome ele ag keeke mutudig enanag ele Jesus gada bapaidkulagnu daden mepig.

2 Aria Juda dilag Metid male uke, wagde butuanab aam dig ma beebe amu ag ahan, men modpa, Jesus gada bapaidkulagnu gonana,

3 ag aka aka apig. “Aun nug ehanika, men nadi mod odepan amu, men amu dutuna megaku?” Men amuam nadinab amunu ag anam apig.

4 Ag anam matinna, ag neekeg uke, men nadi mod odepanu amu laa nug dutune ukom.

5 Amunu ag gona, men mod oopa nona, nid bau laa nug lamen hakab ele nug nadiappa dayeye anidna, ag badapig.

6 Ag anam badan heegeg amu nid bau amu nug aum. “Ag aib badapig. Ag Nasaret ted Jesus, ad

emaitakpa atulpig ele maditeb amge Nug ipa ii daate. Nug edua hibaitom. Ag Nug mepig aben amu iikude anteg!

<sup>7</sup> Amunu ag gona, Petrus amu Jesusnu ipunitak awak danab laa oh ele inam apeg dooglag. 'Jesus Nug anuqa, Galelia gote amunu ag ele gona, Nug anuka aum bia apa Nug anidkulag,' awa aum.

<sup>8</sup> Nug anam a amu ah ag edun, dimitim gona, mod uuna, ag bedulag hahadede, dab mak kudum aopig. Ag huan badapig amunu ag danab laa amegpa ii apig.

<sup>9</sup> [Jesus Nug Metidpa, wagde butuanab edua hibaitowa amu Nug tatam Maria, Magdala ted, nug gumita waum. Ah amuam Jesus Nug anuka oudi nau eblaih adit ele bedupanu lamatom.

<sup>10</sup> Ah nug Jesus anta amu nug uka, nuhikud ipunitak awak danab, ag oolag ug ele gaana daaegeg, ag amelagpa inam aum. "Jesus Nug edua hibaita, bau daate! Da Nug anidmi," awa aum.

<sup>11</sup> Nug anam a, ag Jesus edua hibaitom, ah amu Nug ele antom doopig amge ag oolagpa genab ii doopig.

<sup>12</sup> Aria dimpa danab adit laa a laih gokulahnu ibpa ukaeheh, Jesus Nug bedu edua gumata waum.

<sup>13</sup> Wana amu Jesus Nug he, a Nug dooiya, a eduya goya, nai amu aeh amu laa ag oolagpa genab ii doopig.

<sup>14</sup> Danab laala ag, "Jesus edua aha, bau daate," aeg, ipunitak awak danab elewen ag doopig amge ag oolagpa genab ii doopig. Ag nai amunu ahilag dab makib dim lamidna, "Elele iita," apig amunu

dimpa Jesus Nug ag e lanana daaegeg, Nug tula gumata wana, Nug ahilag hak adit amunu alatom.

<sup>15</sup> Alatawa amu Nug ag amelagpa aum. “Ag ahan, wan atu ohpa gona, dahilnu Nai Ena danab oh amelagpa aig!

<sup>16</sup> Ag apeg doona amu danab laa nug oopa genab doya, layatak aweb amu Kayak nug edua aoku. Laa nug oopa genab ii doya amu nug Kayak noobpa nai ele daaku.

<sup>17</sup> Danab ag dahilnu oolagpa genab dooteb ele amu, ag da onilpa kobol laala danab hekunu elele iita imubia hekulag. Ag oudi nau lamadkulag, ag nailag pide pide matiglag.

<sup>18</sup> Ag mat nau adaglag o le ehed laa lakulag amu amupa ag ii mauhmana. Ag ode danab bedulag adapeg, ag ode uuadku,” awa aum.

<sup>19</sup> Jesus Nug anam a amu Kayak Nug he, Jesus Nug hab atan ta, Kayak epeg nadiappa, amuam anuqak aben, amupa hedep na daate.

<sup>20</sup> Aria ipunitak awak danab ag wan ohpa gona, Jesusnu nai mehuqegeg, Jesus Nug ag ehanatete, ag udat nadi gagatag laala ele heegeg, amupa danab ag mehuqak ahilag genab doopig.]

**KAYAKNU NAI Tituanak Bau**  
**The New Testament in the Nobonob Language of**  
**Papua New Guinea**  
**Nupela Testamen long tokples Nobonob long Niugini**  
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 18 Apr 2025 from source files dated 31 Aug 2023

ed374bb9-d819-53d1-a85b-f86cce3892e1